

藏書紀事詩卷五

長洲葉昌熾

豐沛從龍諸子弟亦知注墨與流丹
汰除羸卒論精騎富察終教勝納蘭

富察昌齡數槎

袁枚刑部尙書富察公神道碑公諱傅鼐字閣峰先世居
長白山號富察氏祖額色泰子四人次子驃騎將軍噶爾
漢輔 聖祖致太平公公以刑部尙書落職薨於

家子三人長昌齡官編修有父風公所居稻香草堂有白
雁峰齧峰東皋南莊諸勝積書萬卷 禮親王嘯亭雜錄

富察太史昌齡傅閣峰尙書子性耽書史築謙益堂丹鉛
萬卷錦軸牙籤爲一時之盛通志堂藏書雖多其精粹蔑

如也今其遺書多爲余所購如宋末江湖諸集多公自手鈔者亦想見其風雅也 李文藻琉璃廠書肆記延慶堂劉氏夏間從內城買書數十部每部有曹棟亭印又有長白敷槎氏堇齋昌齡圖書記蓋本曹氏物而歸於昌齡昌齡官至學士棟亭之甥也 平津館鑒藏書籍記新刊名臣碑傳琬琰集棟亭曹氏藏書有長白敷槎氏堇齋昌齡圖書印

湖上蘿衣釀麴翁甕池編竹自爲傭眼光偶向門攤顧戍削骨頭如老驄 丁敬敬身

杭大宗隱君丁敬傳隱君名敬字敬身號鈍丁自稱龍泓山人家在候潮門外鄰保皆野人也釀麴自給身厠傭

販未嘗自異願好金石之文窮巖絕壁手自摹搨著武林
金石錄性耽羣籍家貧不能出重貲購買門攤市集眼光
所注無留良焉小樓三楹屨屐滿室叢殘不復整理皆異
冊也有三子健與傳皆諸生少子佺亦能詩 汪師韓朱
西峻鳳尾硯歌丁處士敬身所贈作歌報之逋客錢唐丁
翰之婆娑術藝作者師相將一片玉質研何似半卷青蘿
衣自注唐丁翰之居龍泓洞笠澤叢書丁隱君歌云華陽
道士南游歸手中半卷青蘿衣自言逋客持贈我乃是錢
唐丁翰之自余爲此詩敬身遂自號龍泓館主 仇養正
懷丁鈍丁詩龍泓居士眞奇古戍削骨頭如老驄鐵筆獨
傳秦漢法搜碑終日在山中

丹鳳梧桐別舊樓桃花紅到武陵谿寫生亦復含書味滄海

居然賸一蠡

金檀星輅 孫可採心山

嘉興府志桐鄉金檀字星輅諸生經史圖籍靡不徧覽好

聚書遇善本雖重價不恡或假歸手鈔積數十年收藏之

富甲於一邑所著有文瑞樓集銷暑偶錄 楊蟠文瑞樓

書目序婁東金明經星輅自幼嗜古好蓄異書築文瑞樓

以貯之此書目十二卷皆其所藏也明經籍隸桐鄉徒宅

於婁東其於桑梓之文獻罔弗留意康熙己亥校刊貝清

江集四十卷程巽隱集四卷後又訪購鮑徵士西谿集而

不得每以為憾其風雅可想見矣 愛日精廬藏書志皇

元風雅三十卷黃丕烈跋曰書友攜來驗其裝潢是金星

輶家故物非出自尋常藏書人家 韻宋樓藏書志漢泉

曹文貞公集宋賓王跋曰桃花塢文瑞樓藏元板元印字
畫端楷直出松雪又丁鶴年詩集宋賓王跋曰雍正丁未
得竹垞藏本於吳郡桃花塢文瑞樓 昌熾案士禮居句

曲外史詩跋金心山爲吳庠生寫物生動之趣溢於楮墨
又梅花百詠跋心山姓金名可採工文嗜酒而晚善畫又
道餘錄跋金心山余友也住郡中馬醫科巷先世富饒及
身貧窶又云心山所居曰滄蠡閣又雲溪友議跋郡中有
貧士金心山余數年前曾識之不過相遇於歲科試場中
知其能文章而已近心山病且死書賈以其家書籍求售
方知心山爲星輶孫藏書之家淵源有自宜其殘編斷簡

亦多善本矣據此諸跋則星輶自婁東徙吳初居桃花塢
後人中落又徙馬醫科巷桐鄉則其原籍也其藏書余所
見者有文瑞樓結社谿山兩印

習池名士舊青衫獨立蒼苔鶴髮髟徼幸寒灰逃小劫江湖

留得棗花剗

吳允嘉志上

兩浙輶軒錄吳允嘉字志上號石倉仁和人石甌山房
詩 碧谿詩話石倉先生爲湖墅耆宿嗜學好古積數十
年苦心歿後故書散落人間予在汪氏振綺堂見其手鈔
書可數百冊楷法醇古毫無俗餒望而知爲有道之士其
他散見於書賈求售者不知凡幾嘗纂輯武林耆舊集其
橐在吳甌亭先生處予每與何春渚陳二酉談其餘韻訪

其後人僉云不甚深知矣後乙卯夏重客任城訪知令嗣
文思孫漢湜同客山左皆業儒文思曾中副車掌教某書
院石倉口占示兒輩詩幾卷殘書幾畝田祖宗相守已
多年後人窮死休相棄免使而翁恨九泉厲鶚哭吳丈
志上詩斜廊曩畫處尙想立蒼苔自注吳丈書齋有曩畫
廊又題吳志上小象我識石倉叟長身比鶴癯青衫舊
名士白髮老潛夫城市看花入溪山載筆俱襄陽習鑿齒
著述近來無夢闌瑣筆南宋陳思刻江湖小集曹棟亭
寅藏有刊本後歸郎總制廷極藏諸臥內不輕示人幕客
吳石倉曾得一見郎捐館遺命舉臥內書畫古玩盡畀諸
火以爲殉吳袖金數錠餽諸舉火者潛以他書易之而出

吳得是書寶愛甚至後不知轉徙何所乾隆壬寅鮑以文
獲見於吳門市中許以百金不售因借歸家中舊鈔道
過余家於舟中舉示卷帙完好靜氣迎人洵數百年物也
鮑以文詩國寶爭新落棗花江湖處處擅才華祇須小換
紅羊劫傲幸寒灰六十家自注原刻一百二十家名國寶
新編又云卅年饞眼慰瓊琚好事曾驚出燼餘後五百年
重照眼定知何處走蟬魚 拜經樓藏書記說學齋集有
吳石倉州來氏藏書記二印

燕市歸來得楚弓古藤花下一尊同薦橋舊日諸詩老同作

新詩告殯宮

吳焯尺牘

子城敦復

玉墀蘭陵

杭郡詩輯吳焯字尺牘號繡谷錢唐人有葑園詩彙陸渚

鴻飛集注云尺鳧喜聚書凡宋雕元槧與舊家善本若飢渴之於飲食求必獲而後已故瓶花齋藏書之名稱於天下所輯薰習錄則紀所藏祕冊也家有古藤一本構亭曰繡谷自號繡谷老人花時柔條下垂如瓔珞置酒高會吟賞不倦魏柳洲之琇詩云武林吳氏號詩藪亭子倚花名繡谷雅集當時多勝流豪吟邇日尙耆宿皆紀其實居在薦橋厲太鴻詩所云詩人家住薦橋街者也 又吳城字敦復號甌亭錢唐監生注云甌亭爲尺鳧先生長子承其先業雅好聚書儲藏所未備者搜求校勘數十年丹黃不去手所居在九曲巷口與振綺堂汪氏衡宇相望 又吳玉墀字蘭陵號小谷又號二雨焯子城弟乾隆庚寅順天

舉人由太平教諭歷官貴陽府長寨同知有味乳亭集注
云乾隆閒開四庫館小谷恭進經部陸氏易解等九十
餘種史部四明它山水利備攷等二十餘種子部東宮備
覽等三十餘種集部李遐叔文集等三種 欽賜

御題

宸翰并

賜內府初印佩文韻府

全函一時傳爲盛事 吳城詩先君子舊藏許渾丁卯集
失去二十餘年余於京師重得之先子圖章宛然簡端撫
今追昔因得長律三首手澤猶存小劫中金臺重購自城
東去來空自悲雷劒得失何須問楚弓風景年年人代換
殯宮寂寂夢魂通九原不共殘編作灑淚摩挲讀未終浪
漫天涯劇可憐放懷隨處領山川淒涼過眼雲煙錄停泊

浮沈書畫船燈火青熒如昨夢風簾點勘記當年縱橫私
印猶完好故物歸來信宿緣汗簡芸箱破寂寥古香依舊
伴清宵拜經莫笑同痴嗜啜墨何能慰腹枵檢校歸裝惟
筆研思量生計只漁樵江山風月雖堪主豈忍重經丁卯
橋 又趙昱詩故人繡谷翁素業今有後插架饒萬卷郎
君能密受昨歲賦北征目擊心慘愀一編手澤新故物爲
吾取歸來屬流詠父客若某某遺書重丁卯感逝在癸丑
雲煙洵過眼聚散無乃偶身沈名自飛家禪學業久太息
予索居賤老邱樊守五載京國游躡蹬風塵走還將舊雨
尋室是人琴否瓶花坐空齋老藤延几牖憶翁耽典籍愛
護等瓊玖往往許假鈔校十得其九叢書精審過運管勘

不苟嗟哉衣食謀勿爲飢寒詬吾亦示兒曹制矩緬良友
誠以蒲公言三復眞不朽自注繡谷藏書頗矜惜不輕借
人獨許予鈔予所藏多繡谷亭本予偶得善冊先生見之
亦必取以勘定 又金志章詩樓居插架踰萬籤五車四
庫皆能兼丹黃一一手勘定部分鱗次何精嚴就中名集
數丁卯槩本最古心所欣何年一鷗竟羽化巧偷豪奪生
憎嫌六丁冥搜苦無計廿載抱憾歸幽潛讀書繼緒有令
子手澤每念襟常霑驅車偶然適燕市輒紅撲面塵纖纖
朝聞邸舍打門急有客持售初開函衛公故物忽驚覩悲
喜交集敬拜瞻卷端題識認遺墨左方印記留朱鈐呵護
定蒙鬼神力點沅未受蟲魚齧探囊購贖敢辭罄百綏索

價甯嫌貪楚弓楚得足深慰摩挲繡玩忘飢饒羽陵蠹簡
共什襲宛委祕冊同包緘攜歸陳書告先子水沈細炷方
銅匱孝思靈爽共感召丁部重入如新添熊熊日上吐光
氣南極果應星文占抽思騁祕發高詠妙處神味超酸鹹
同時題贈悉巨手雕章麗句盈細縑惟余經年負夙諾苦
吟屢斷霜髭拈郢州有知應大笑笑我細響徒詰詰不如
韜筆且藏拙靜看花影搖風簾 又厲鶚詩今人號知書
事簡效頗速揣摩盈尺編姓氏春官錄翩然狃天門高步
嘲宿讀我友繡谷翁種學恥徵逐盡出橐中金萬卷購連
屋述作資見聞校勘窮反覆同心有數子牽連乃到僕渠
成亦秦利借寫誇眼福翦韭論深宵對榻就家塾每歎津

逮難散亡思並蓄翁俄爲飛仙墓拱十年木有子能繼之
衣食自節縮蒐羅及叢殘更續西齋目昨去長安游閱市
淚滿笄詩題丁卯橋手澤喜重復紛紛紈袴兒膏粱果癡
腹諒哉坡公言如倚几折足插架本無多易炊只供鬻凌
雲當一笑知勿恨雌伏

回首東書舊草堂深閨流涕對琳琅蹉跎四十年前事無限
心情感渭陽

趙昱功干

弟信辰垣

子一清誠夫

鶴徵後錄趙昱字功干原名殿昂號谷林浙江仁和人貢
生著有愛日堂集注云子一清字誠夫能昌其家學 又

趙信字意林監生有秀硯齋吟橐昌熾案信字辰垣意林
其號 詞科掌錄意林與兄功干齊名稱二林 又翟晴

江東皋詩序谷林小山堂圖籍埒於祕省益之以四明范氏廣陵馬氏之借鈔加以吳君繡谷亭之伙助窮搜博討傾筐倒庋而不惜 全祖望小山堂藏書記谷林以三十年之力爬梳書庫其鑒別既精而有弟辰垣好事一如其兄有子誠夫好事甚於其父每一聞異書輒神色飛動不致之不止其所蓄書連茵接屋凡書賈自苕上至閩小山堂來取書相戒無得留書過夕恐如齊文襄之待祖珽也 又曠亭記谷林太君朱氏山陰襄毅公女孫祁氏之所自出祁公子東遷夫人取朱氏女孫育之以遣日卽谷林太君也方谷林尊公東白翁就婚山陰其成禮卽在祁氏東書堂中是時澹生堂中之牙籤尙未散東白翁心思

得之太君泣然流涕曰亦何忍爲此言乎東白翁默而止
蹉跎四十餘年谷林渡江訪外家則更無長物祇曠亭二
大字尙存董文敏公之書也乃奉以歸谷林藏書中亦多
澹生舊本欲於池北竹林中構數椽卽以曠亭名之以志
涓陽之思以爲太君當新豐之門戶 又小山堂祁氏遺
書記二林兄弟聚書得之江南儲藏家者多矣獨於祁氏
諸本則別貯而弄之惓惓母氏先河之愛一往情深珍若
拱璧何其厚也 谷林愛日堂集購得山陰祁夷度先生
文集又吳門王邵棠見遺澹生堂藏書印章予蓄祁氏書
僅數十冊年來欲廣收而未能也志感二首文獻江東舊
業傳澹生堂認蠹餘篇負慚宅相搜遺集重憶館甥悲昔

年忠孝成家惟習學兵戈換劫等雲煙黃金散盡貧猶樂
何惜初時裝訂錢繆書深印赫蹠光剗角精瑩水玉方四
庫標題千帙徧一甌爭抵百縑強曠亭舊蹟荒園業遺象
清風曲水旁誰爲流傳王粲是令人尤念蔡中郎自注書
多爲梨洲先生所得又云曠亭額王百穀爲夷度使君書
予昔年來過亭已傾圮扁棄屋角亟攜以歸欲於園中構
亭仍懸是額以誌景仰 趙東潛重書曠亭記曠亭者王
百穀爲夷度使君書明社旣屋陵遷谷變有以此扁來售
者先徵君輸米四石易之欲構亭於竹間而力不能就今
七父篤念太君築室三楹於古香書屋之傍命弟天庚更
書而顏之昌熾案曠亭額全謝山記謂董文敏所書當以

谷林詩東潛記爲正 碧溪詩話谷林先生同時吳尺鳧
亦好藏書每得一異書彼此必鈔存互爲校勘數過識其
卷首小山書畫印牙章精篆神采可愛先生卒後悉載歸
廣陵馬氏比部魚亭與先生爲僚壻盡借其善本錄副以
藏予館比部家十數年見先生校書跋語知先生點勘之
精

竹西觴詠街南屋簾幕春深紫燕斜論定異書剛讀罷陶然
同醉碧山槎 馬曰瑄秋玉 曰璐佩兮

杭世駿馬君墓誌銘君諱曰瑄字秋玉號嶰谷祁門人祖
承運始家於揚考謙生君及季弟曰璐合四方名碩結社
韓江人比之漢上題襟玉山雅集著詩十卷今所行沙河

逸老集是也春秋六十有八卒無子以曰璐子振伯爲後
鶴徵後錄曰璐字佩兮號半槎有南齋集注云馬氏小
玲瓏山館儲書之富著於東南半槎與兄嶰谷並擅清才
沈酣深造不僅充漁獵之資吾浙如樊榭堇浦謝山諸先
生咸主其家竹西觴詠之盛於斯爲最 全祖望叢書樓
記揚州馬氏嶰谷半查兄弟居之南有小玲瓏山館園亭
明瑟而巋然高出者叢書樓也逆疊十萬餘卷予南北往
還道出此間苟有宿留未嘗不借其書而嶰谷相見寒暄
之外必問近來得未見之書幾何其有聞而未得者幾何
隨予所荅輒記其目或借鈔或轉購窮年兀兀不以爲疲
其得異書則必出以示予席上滿斟碧山朱氏銀槎侑以

佳果得子論定一語卽浮白相向方予官於京師從館中
得見牙樂大典萬冊驚喜貽書告之半查卽來問寫人當
得多少其直若干從與予甚銳予甫爲鈔宋人周禮諸種
而遽罷官歸途過之則屬予鈔天一閣所藏遺籍蓋其嗜
書之篤如此 姚世鈺叢書樓銘重屋聯檣叢書於閒經
史子集搜羅駢闐學古有獲非託空言維孝友于奉以周
旋三才一貫百行同源讀書種子此爲最先仰瞻高樓遙
睇陳編我揭斯義如日中天慶雲所護過者式焉 沙河
逸老集街南書屋十二詠其叢書樓云下規百弓地上蓄
千載文他年親散帙惆悵豈無人 又南齋集詩卷帙不
厭多所重先皇墳惜哉飽白蟬撫弄長欣欣 何琪小玲

龍山館觀汪雪疆所藏宋刻江湖小集詩我來廣陵三月
半簾幕家家飛紫燕城東有園春尙賒芳樹初飄花一片
主人嗜古兼耽吟歐趙風流今再見朝來示我詩一編睦
親坊刻此爲冠綠蘿陰裏乍開函醅醕古香紛撲面

千年樹根化爲蟾來伴碧廚三萬籤誰向西州一灑淚懷君
更及趙東潛

王德溥容大

杭郡詩輯王德溥字容大號澹和錢唐諸生事親至孝營
幽窺十厯寒暑陸筱飲飛爲畫種松圖以寄哀先是其父
鈞字馭陶耄年歸里闢養素園以自娛樹石池館之勝甲
於里中澹和喜聚書又築寶日軒爲藏弄之所祕冊古槧
充物其中 又王曾祥茨檐食貧力學饒饒不給嘗假館

繡谷吳氏小山趙氏養素王氏皆藏書家茨檐左右采獲
益肆力爲古文詞 又汪興穀字穎齋號松谷又號小麓
晚號幻香仁和人爲趙誠夫之甥王容大之女孫壻以未
得親炙爲憾嘗於春草園覓曠亭額不得歎曰昔趙氏爲
祁氏外孫藏書大半歸之復得此額構亭以存其舊今趙
氏書籍散佚而王氏養素園所藏亦復零落余不能珍弄
繼起爲可愧耳 昌熾案澹和集中有過西馬塍市見樹
根逼肖三足蝦蟇漫成短篇云千年樹餘盤根化爲蟾可
長存入市相逢買得歸摩挲拂拭忘朝昏張頤如虎撐雙
目似躍兩足一足蹲背上痲磊長肉芝疑有熒煌之光如
吐香 金顧裴題王馭陶耕讀圖高廩屯紅粒香芸繞碧

廚

學究青雲別有梯行疏幅廣字難擠若言宋本皆精妙偏有

麻沙出建溪

杭世駿大宗 注一之

鶴徵後錄杭世駿字大宗號堇浦浙江仁和人雍正甲辰
進士由浙江總督程元章薦舉授編修著有續禮記集說
金史補史漢北齊書疏證續方言詞科掌錄榕城詩話道
古堂詩文集注云先生歸田後自號秦亭老民與里中耆
舊及方外之侶結南屏詩社 蒲褐山房詩話先生以言
事罷歸沈文愨公送之有句云鄰翁旣雨談牆築新婦初
婚議竈炊蓋惜之也先生有十子自第八子賓仁外餘皆
下世 王瞿道古堂集序堇浦於學無所不貫所藏書擁

榻積几不下十萬卷堇浦枕藉其中目睇手纂幾忘晷夕
閒過友人館舍得異文祕冊卽端坐默識其要 道古堂
集補史亭記杭子疏證北齊書旣畢越明年乃補金史先
入庀屋積有餘材營度後圃規爲小亭窗楹疏達高明有
融乃徙先世所遺羣籍凡有關涉中州文獻者悉置其處
廣榻長几手目讐溫閒有開明輒下籤記 又欣託齋藏
書記汪子一之性無他嗜壹意於羣籍補其遺脫正其譌
繆儲蓄旣多鑒別尤審又云宋刻兩漢書板縮而行密字
畫活脫注有遺落可以補入此眞所謂宋字也汪文盛猶
得其遺意元大德板幅廣而行疏鍾人傑陳明卿輩稍縮
小之今人錯呼爲宋字拘板不靈而紙墨之神氣薄矣今

之挾書以求售者動稱宋刻不知卽宋亦有優劣有大學
本有漕司本有臨安陳解元書棚本有建安麻沙本而坊
本則尤不可更僕數青雲梯錦繡段皆成於臨場之學究
而刻於射利之賈豎皆坊刻也不謂之宋刻不可也五十
年以前曾與吳繡谷趙勿藥兩君斷斷切究之自矜以爲
獨得之祕一之卽能登吾堂而嚙吾齋可不謂之夙有神
解乎欣託齋有山池之勝一之讀書其中卽藏書於其中
積卷至二十萬有奇可謂富矣 拜經樓藏書題跋記宋

本前漢書仁和朱朗齋跋云武林汪氏有振綺堂爲藏書
之所與同郡諸藏書家若小山堂趙氏飛鴻堂汪氏知不
足齋鮑氏瓶花齋吳氏壽松堂孫氏欣託山房汪氏皆相

往來彼此互易借鈔借校因得見宋槧元鈔不下數百十
種然其中關繫經史之大者無多惟欣託山房有魏鶴山
儀禮要義一部爲經學失傳之本

查浦查田有典型涪陵留共片氈青吳山家近忠清里燕市
園鄰接葉亭

沈廷芳晚叔

鶴徵後錄沈廷芳字晚叔一字菽林號椒園浙江仁和人
由兵部侍郎楊汝穀薦舉除庶吉士官至河南按察使著
有隱拙齋集昌熾案杭大宗有隱拙齋箴沈果堂有隱拙
齋記果堂又有沈公墓表云仁和沈公以乾隆十六年十
一月壬申葬其縣皋亭山公子廷芳請表其墓公諱元滄
字麟洲以副榜貢生進經籍

聖祖仁皇帝命入武

英殿書局康熙六十年授文昌縣 全祖望送沈菽林之
蔚州引康熙中葉鹽官查氏之詩鼓動一時菽林尊公文
昌君爲聲山詹事愛壻詹事下世查田諸老相繼歸里而
風波驟起門戶蕩析文昌亦橫遭吏議菽林崎嶇患難藏
書星散 藤陰雜記接葉亭在爛麪胡同乾隆丁巳沈椒
園侍御寓此徐恕齋以丹贈詩云牀休論上下廡各占西
東詩派追初白宦情共輓紅 楹書隅錄黃先生大全文
集五十卷後有跋云黃山谷集南宋刊本吾家世藏宋本
僅留此種是可寶也子孫其善守之乾隆壬戌除夕隱拙
翁廷芳志各冊有查昇之印仁和沈廷芳字晚叔一字某
園古柱下史古杭忠清里沈氏隱拙齋藏書印購此書甚

不易遺子孫弗輕棄等印先生爲聲山宮詹外孫是書乃查氏所藏而後歸沈者世無二本洵至寶矣

敝裘典盡典遺書且訪監倉策蹇驢如此長安居不易猶分清俸苦鈔胥

全祖望紹衣

鶴徵後錄全祖望字紹衣號謝山浙江鄞縣人乾隆丙辰進士改庶吉士散館外補假歸著有鮎埼亭詩文集注云先生有兄祖謙六歲殤太夫人哭之哀忽張目曰吾當再來補之後十年生先生亦慧甚故小字曰補 嚴可均全紹衣傳性好聚書弱冠時登范氏天一閣謝氏天賜閣陳氏雲在樓遇希有之本輒借鈔昌熾案謝山有讀吳草廬春秋纂言云鈔之同里陳同亮處士家此卽雲在主人陳

小同也 鮎埼亭集雙韭山房藏書記子家自先侍郎公
藏書大半鈔之城西豐氏其直牙陵講筵賜書亦多所稱
阿育王山房藏本者也侍郎身後歸於宗人公之手以其
爲長子也先和州公僅得其十之一宗人子孫盡以遺書
爲故紙權其斤兩而賣之無一存者先宮詹平淡齋亦多
書諸孫各分而有之遂難復集和州春雲軒之書一傳爲
先應山公再傳爲先曾王父兄弟日積月累幾復阿育王
山房之舊而國難作里第爲營將所踞見有巨庫以爲貨
也發視皆書大怒付之一炬先贈公授徒山中稍稍以束
脩之入購書其力未能購者或手鈔之先君偕仲父卽以
鈔書作字課已而予能舉楮墨先君亦課以鈔書吾鄉諸

世家遭亂書籤無不散亡吾家以三世研田之力復擁五
萬卷之儲胥其亦幸矣雙韭山房者亦先侍郎之別業在
大雷諸峰中今已摧燬而先贈公取以顏其齋者也 又
春明行篋當書記予年來陸走軟塵水浮斷梗家書五萬
卷中常捆載二萬卷以爲芒屨油衣之伴舟車過關口稅
司諸吏來肱篋者如虎一見索然相與置之而去雍正癸
卯留滯長安米貴居大不易不能不出其書質之適監倉
西冷黃君聞余之有是舉也請歸之於其邸黃君之邸與
予有十里之遙過此以往蕭晨薄暮偶有攷索策蹇驢而
爲剝啄之聲者非予也邪雞黍之請自此殷矣 謝山年
譜乾隆元年先生入庶常館借牙樂大典讀之鈔高氏春

秋義宗荆公周禮新義曹放齋詩說劉公是文鈔唐說齋
文鈔史眞隱尙書周禮論語解袁正獻正肅文鈔牙樂甯
波府志皆世所絕無而僅見者昌熾案先生鈔牙樂大典
記見鮎埼亭集外編

太卜三夢先致觴鄭人訟鹿更迷離撥灰縮粕何須爾轉瞬
鐘鳴欲覺時

董煇謂瑄

董蠡舟鑄范

兩浙輶軒錄董煇字謂瑄一字訥夫烏程人諸生雍正甲
寅薦博學鴻詞著南江詩文集陳世修序略曰謂瑄沈靜
嗜學家富藏書又嘗游其外王父曹秋岳先生之門倦圃
所藏人間不經見書謂瑄獨窺之故學有原本昌熾案倦
圃之壻名師植字聖衣一字汾園烏程諸生亦見輶軒錄

張鑑夢好樓記周官太卜掌三夢而列子六候與經不異三曰思五曰喜其爲氣淫於藏則有餘於內不足於外一也里中有沈默之士曰董子鑄范讀書志古不慕榮祿於書靡不窺而猶病其藏家之少閱市之淺顏其所居之樓曰夢好棐几竹榻百城面南以寄其深愛篤嗜之思

又云自宋歐陽氏信齋然日本古文之說而後之託安國孝經以暨毛漸三墳豐坊魯詩不一也以子之夢其必撥灰縮粕神游域外將遠駕乎皇侃論語義疏七經孟子攷文之足貴不大快歟 又云余曩在琅嬛仙館校文瀾閣未收之書得百有數十種皆非世所經見心欲鈔其副而苦無力然則余之校不過一夢而子今之夢又焉知不爲

得鄭人之鹿者邪鑄范名蠡舟烏程人爲余同年雲帆先生子世家舊姓近見其藏書目所得蓋不少矣遂爲之記
祕囊已作君山贈流電飄風不再來幾等青田花乳癖閉門
三日泣瓊瑰 王藻載揚 楊復吉列歐

蘇州府志人物傳吳江王藻字載揚平望人好爲詩初業
販米嘗題桃源圖編修沈樹本見之極口延譽遂游京師
乾隆元年薦舉博學鴻詞罷歸好蓄宋板書青田石印章
有友借觀誤墮地碎垂泣三日其風趣如此 又楊復吉
字列歐乾隆壬辰進士歸班需次年未及壯好聚書王鳴
盛深推服之 遜志堂雜鈔余好藏書借鈔於盧抱經學
士王西莊光祿吳槎客明經楊列歐進士 昌熾案列歐

所著有夢闌瑣筆云宋汪彥章浮溪文粹明初板用繭紙
印後附羅鄂州遺文二篇乾隆庚辰購之張太史損持後
人又周霆震石初集較他本多幾倍蕞損持先生任興國
時所鈔壬寅歲鮑淥飲過訪見而愛之余因持贈後有元
文選之役向淥飲索之久無以報存亡不可必矣

鴛鴦不惜度金鍼字字書林座右箴三折肱爲醫國手廣長

舌是佛家心

孫從添慶增

稽瑞樓書目春秋經傳類求十二卷邑人孫從添過臨汾
同撰從添字石芝好聚書 黃丕烈藏書紀要跋孫慶增
所藏書余家收得不下數十種其所著述則未之聞也此
藏書紀要言之甚詳且備蓋亦真知篤好者孫公去世未

遠周丈香巖幼年曾見之時已七旬餘兼善醫術其所藏書鈴尾一印曰得者寶之殆守人亡人得之訓耶藏書紀要自序余無他好而中於書癖家藏卷帙不下萬數雖極貧不忍棄去數年以來或持橐以載所見或攜篋以誌所聞念茲在茲幾成一老蠹魚矣同志欲標其要竊不自量紀爲八則其當與不當冀有識者諒之虞山土善堂慶增氏孫從添筆

海東耆獻隱塵市舊聞掌錄七絃谿登樓俗士頻迴駕此是

龍門百尺梯

魚元傅虞巖

同治蘇州府志魚翼字振南自號烏目山樵明開封守侃

九世孫平又魚元傅字虞巖翼子素嗜書尤好金石文竅

巖絕壑手自摹搨許行健海虞畫苑略序天池山人魚
君振南負才而隱於市廛性喜畫善鑒別古蹟真贗又
王應奎序魚翁以廉吏子孫所居臨街小樓收藏古今名
蹟甚夥俗子請觀者拔梯不令上有吾子行之風撰海虞
畫苑略未竣令子虞巖續成之顧鎮魚虞巖墓表君諱
元傅字虞巖常熟人旣析縣爲昭文人世篤孝友君性剛
於世少所可獨嗜書雪鈔露纂矻矻不少休尤熟於里中
掌故凡寸緘片紙爲鄉先輩所遺者寶護如拱璧至一樹
一石並識爲某家物其變遷易主曲折原委如數家具君
坐臥一小樓嘗爲余言魚氏居此閱十四世矣卒時在乾
隆三十三年十月初四日年六十五鐵琴銅劍樓書目

書齋夜話四卷石田翁物歸魚虞巖間止樓又曲洧舊聞
有魚東川藏書記 持靜齋書目黔書二卷魚元傳手鈔
有魚東川藏書印

元蟬噪窗日卓午當風散書書有梘抱書太息得者誰但願

生逢晁公武

顧士榮文甯

鐵琴銅劔樓書目詩式邑人顧文甯藏卷首有臣榮之印
又吟窗雜錄亦文甯所藏文甯名榮居邑之梅里鎮詩人
也昌熾案文甯名士榮與王柳南同訂海虞詩苑其纂書
有感云元蟬噪薰風嘒嘒庭前木晴窗白晝長赤日盛炎
熯不暇傲羲皇且抱殘編暴芸馥當風散衣魚隨手撲破
損感年深校閱憐毫禿不惜傾囊購不辭胝手錄誇人未

全貧堆牀尙連屋世緣已漸忘愛此猶骨肉身後無可授
生前不能讀展看三太息將入阿誰目有聚應有散此理
籌之熟自笑尙忘疲檢點仍歸匱

杭州壽松堂孫氏蘇州壽松堂蔣氏同在乾嘉全盛時各闢

小齋貯經史

孫宗濂栗忱

子仰曾

蔣升瀛步蟾

杭郡詩輯孫宗濂字栗忱號隱谷仁和人乾隆甲子舉人
注云隱谷一試春官不見收遂息轍鄉里構堂曰壽松藏
書數萬卷以枕肱爲樂年四十三而歿一時士論惜之

杭世駿孫隱谷傳隱谷未嘗一日廢書庭有嘉樹築堂名
壽松廣儲羣籍有友六七人皆高岸無凡情時來偃息
拜經樓藏書題跋記宋本前漢書仁和朱朗齋跋云壽松

堂孫氏有溫公通鑑一部較外間明刻本多增所未備洵有補於史學 四庫提要乾隆三十九年五月十四日奉

上諭今閱進到各家書目浙江吳玉墀孫仰曾汪汝璉俱藏書舊家每人賞給初印之佩文韻府一部以示嘉獎昌熾案仰曾宗濂之子 士禮居藏書題跋記淳祐

臨安志六卷簡莊賦詩云關心志乘無全帙屈指收藏又一家自注同郡孫氏壽松堂舊藏宋本乾道臨安志三卷

又東京夢華錄十卷濂溪蔣氏散出爲壽松堂孫氏收得宏治甲子刊本每葉十六行行十六字 又西谿叢語

壽松堂蔣氏有錢遵王校本又有一舊鈔本 莫氏宋元舊本書經眼錄四書集注宋本鴻城蔣懷堂珍藏蔣氏跋

云曾王父諱升瀛字步蟾一字惠堂又號采若南宋希魯公之二十世孫世居吳淞之鄧港村公自幼厲志讀書早歲有聲庠序後遷入城蕭家巷辟鏡古齋藏書多宋槧本郡守鼇石蘇公重刊魏公譚訓稱壽松堂蔣氏宋本校刊者卽公所藏也同治丙寅仲夏培澤敬識

握手城東問紀羣弟兄父子並能文勘書難似孫深柳池館

松聲坐水雲

汪憲千陂 子汝璫坤伯 瑜季懷 璐仲連 孫誠孔皆 曾孫遠孫久也

杭郡詩輯汪憲字千陂號魚亭錢唐人乾隆乙丑進士官刑部陝西司員外郎有振綺堂彙注云魚亭性耽蓄書有求售者不惜豐價購之點注丹黃終日不倦乾隆三十七

年

詔求遺書其長君汝璫以祕籍經進

御

題曲洧舊聞書苑菁華二種

恩賜佩文韻府一部

文綺二端足爲海內嗜學之儒勸矣 又汪汝璫字坤伯

號滌原憲長子有北窗吟橐 又汪瑜字季懷號天潛憲

季子子初字絳人邑諸生 又汪璐字仲連號春園憲子

乾隆丙午舉人有松聲池館詩四卷 又汪誠字孔皆號

十村璐子乾隆甲寅舉人刑部主事注云十村篤志縹緲

無他嗜好先世藏書最富而未有書目因取所藏書編分

四部詳攷撰書人並注明得自何本閱歲而成凡書三千

三百餘種計六萬五千卷 又汪遠孫字久也號小米誠

子嘉慶丙子舉人候補內閣中書注云小米溺苦於學盡

發先世藏書讀之所著有詩攷補遺國語攷異發正古注

漢書地理志校勘記借閒生詞購別業於水磨頭曰借閒
小築因自號借閒漫士 又汪迪孫字子惠誠子 陳奐
師友淵源記小米家有四世藏書振綺堂目甲於浙右卒
年僅四十有三弟适孫字亞虞卒年四十邁孫字少洪卒
年四十六 胡敬內閣中書汪小米傳孔皆公以君之嗜
學也病中指楹書示曰他日以畀汝君著書務爲根柢之
學子一曾撰 陳用光振綺堂書目序余來杭州聞汪舍
人遠孫家藏書甚富借觀其目舍人旣以臨安志見贈並
索爲目錄序舍人之藏書分經史子集爲四部部各有子
目而所攷證其書之佳否真僞及得書之緣起自注於上
方甚詳且秩然有條理也 鮑廷博輓汪魚亭比部詩整

整牙籤萬軸陳林閒早乞著書身種松漸喜龍鱗老埋玉
俄驚馬鬣新清白家聲欽有素丹黃手澤借還頻西風誰
送山陽笛偏感春明儗宅人自注先生旣捐館余尙向鄴
架借書 龔自珍雜詩振綺堂中萬卷書乾嘉九野有誰
如季方玉粹元方死握手城東問蠹魚 張廷濟題汪小
米松聲勘書圖校書難比著書難深柳圖傳孫叔然難得
水雲今健者更搜文字到盧前自注校書難比著書難孫
頤谷侍御自題深柳勘書圖句

集注標題五百家此風作俑自麻沙東坡居士如相見捧腹

難禁覬覬哇

馮應榴星實

弟集梧軒圃

嘉興府志桐鄉馮應榴字星實浩長子乾隆辛未進士江

西布政使 又馮集梧號鷺庭浩少子乾隆辛丑進士授

編修 湖海詩傳集梧字軒圃有貯雲居橐 蒲褐山房

詩話鷺庭多藏書精校勘嘗刻元豐九域志杜樊川詩注

惠定宇後漢書補注 潛研堂文集星實先生沈酣於東

坡詩者有年又得宋槧五百家注元槧百家注舊本參以

施注殘本稽其同異而辨正之昌熾案唐杜韓柳集亦有

五百家注皆坊肆射利者所爲不足重也翁覃溪復初齋

集有夢蘇草堂歌爲馮星石少卿賦張叔未桂馨堂集有

馮星實夢蘇草堂圖詩爲金芸舫森賦 拜經樓藏書題

跋記馮星實太史補注蘇詩屬其戚項根堂從余借宋刻

王狀元蘇詩不意爲中閣故馮刊所引王注亦多不全未

免遺憾

蘇帖蘇詩共一龕寶蘇室願學蘇庵僧厓笠屐曾相訪一葦
煙篷到嶺南

翁方綱正三

先正事略翁先生名方綱字正三號覃溪順天大興人乾隆十七年進士由內閣學士左遷鴻臚卿嘉慶十九年重預瓊林宴 賜二品卿銜時年八十二矣又四年卒

先生精心汲古宏覽多聞嘗得宋槧蘇詩施願注本因以寶蘇名其室自爲補注 復初齋文集寶蘇室研銘記子年十九日誦漢書一千字明海鹽陳文學輯本也文學號蘇庵則願以蘇齋名書室竊附私淑前賢之意戊子冬得蘇書嵩陽帖癸巳冬得蘇詩施願注宋槧殘本益發奮自

勗於蘇學始以寶蘇名室。又坡公笠屐象贊此象繪於
粵東時甫得嵩陽帖載一葦之煙篷後廿七年供於蘇齋
之中乃得偃松屏贊與施顧集注共香篆而交玉虹浩乎
襟袖大海長風。又跋李雁湖注王半山詩云同年盧抱
經借錄予昔年得宋槧施注蘇詩今得借鈔李注王詩皆
宋本之未經後人刪亂者而又皆是殘本事之相合有如
此。又詩集買得蘇詩施注宋槧殘本卽商邱宋氏藏者
國初海虞有二本其一寅歲收六丁維時湖南寶晉叟
把卷凭閣看飛熒宋元舊本鏤次第獨此未及傳模型可
憐醴泉化度法瑤臺戍削留娉婷也是園翁痛著錄不得
再顛隄糜馨一朝東吳故家得四十二卷重汗青黃州判

官有舊夢笠屐圖子來丁甯由儀篇忽上客補束廣微濫
吹竽聽銜薑黠鼠到潛采眾目特讓查田醒江南書手費
影寫掇拾想象於奇零施注實維施願注施家蘇學詒過
庭紹興書藏嘉泰歲淮東板出倉曹廳漢稚楷書作佳話
湖州詩獄此又經石鼓文與會稽志同時校槧新發硯毗
陵先生世莫識要以土蝕成青萍卷前惜闕譜及目世間
僅此鳳與星適者又得顧禧集文字聚合憑精靈重開此
本倘異日敢任嘉穀滋蝗螟摹公書帖奉公象笑彼亭長
署杜亭我當焚香日望拜公平弭節來雲輶自注宣和間
禁蘇氏文字學者私記其書曰毗陵先生 自題三萬卷
齋笑論架插鄴侯籤已愧湖州目錄兼秀水廚難八萬擬

黃甘字孰兩行添漢碑草草傳洪适宋槧寥寥拜子瞻化
度銘圖摹范老賜書樓印敢輕鈐姚鼐惜抱軒詩集翁
覃溪學士出示所得宋雕本施注蘇詩舊藏宋中丞家者
欣賞無已乃次重九詩韻茲晨招客爲看書來似鴻儔飛
撲撲雕鐫遠有嘉泰字收藏近與商邱較蘇詩傳世幾千
首高語去天真一握當年獄案可悲傷他日注家還踏駁
此編晚出施顧手黨禁正解東南角後來補闕更何如虎
賁雖在中郎邈耽詩愛古皆結習計短衡長非大覺曾薄
富貴書何厚甘典衣裘襟可捉子瞻自是千載人學士豈
比無心學佳本與公吾亦欣叩門會辦來觀數其藏印
曰蘇齋墨緣曰蘇齋眞鑒曰祕閣校理又有恩加

二品重讌瓊林一印內閣學士內閣侍讀學士翰林侍讀
學士一印

月蝕盧仝認舊題抱經分峙浙東西金峨玉几青厓宅學士

姚江近會稽

盧文弨紹弓

盧青厓

翁方綱抱經先生墓誌銘公姓盧氏諱文弨字紹弓號磯
漁又號檠齋晚更號弓父抱經其堂顏也人稱曰抱經先
生乾隆壬申一甲第三人進士官翰林院侍讀學士生於
康熙丁酉六月三日卒於乾隆乙卯十一月二十八日子
男四慶詒武謀慶鍾慶錄 嚴元照書盧抱經先生札記
後先生喜校書自經傳子史下逮說部詩文集凡經披覽
無不丹黃卽無別本可勘同異必爲之釐正字畫然後快

嗜之至老愈篤自笑如猩猩之見酒也 錢大昕盧氏羣
書拾補序抱經先生精研經訓自通籍以至歸田鉛槧未
嘗一日去手奉廩修脯之餘悉以購書遇有祕鈔精校之
本輒宛轉借錄家藏圖籍數萬卷手自校勘精審無誤自
宋次道劉原父諸公皆莫能及也 金牲題盧紹弓編修
檢書圖盧郎溫潤乃如玉獨有校勘嚴仇讐目勞手倦苦
相角授經餘力閒須偷矧當退食百城擁縱橫穿穴資旁
搜尋蹤宛轉蛇赴壑得雋掣曳魚銜鉤後先佐證每連逮
新舊逋責期畢收時時堆案礙雙肘正似獼祭陳沙洲
錢大昕抱經樓記四明古稱文獻之邦宋元之世攻媿樓
氏清容袁氏藏書之富甲於海內明代儲藏家則有天一

閣范氏而四香居陳氏南軒陸氏次之然聚多易散唯范氏之書巋然獨存浙東西故家莫能逮焉盧君青厓詩禮舊門自少博學嗜古尤善聚書遇有善本不惜重價購之聞朋舊得異書宛轉借鈔晨夕讐校搜羅三十年得書數萬卷爲樓以貯之名之曰抱經蓋取昌黎贈玉川子詩語也曩余在京師與君家召弓學士游學士性狷介與俗多忤而於余獨有水乳之投學士藏書萬餘卷皆手校精善而以抱經自號青厓與學士里居不遠而嗜好亦略相似浙中有東西抱經之目茲樓之構修廣閒架皆摹天一閣而子孫又多能讀書者日積而月益之罔俾范氏專美於前是所望也 兩浙輶軒錄補遺倪象占字九山象山優

貢生著有青櫺館詩館郡城盧青厓家盧氏有抱經樓藏書數萬卷九山俱經手校乃作抱經樓藏書記一篇石刻

行世

頰面何憂脂藥錢且聽宋槧及唐鐫手持篋櫝飛雄辯玉屑

霏霏落四筵

蔣宗海春農

宋元以來畫人姓氏錄蔣宗海字春巖號春農丹徒縣人壬申進士官內閣中書工詩能篆刻又善丹青著有春農吟藁 翁方綱蔣春農文集序乾隆壬申進士以古文明家者二人餘姚盧紹弓丹徒蔣春農紹弓之文得力於校勘諸經貫串百家每聯几賦詠紹弓起步庭中以手自拭其面同人笑曰此君胸中剖別同異省卻頰面脂藥錢耳

而春農每來座中手篋橫快辨橫飛有與商古籍者則屈指唐鐫宋槧某書某板闕某處某家鑒藏某帖如貫珠如數家珍問者各得其意以去而春農雜以諧謔初若不經意也 顧宗泰月滿樓集懷蔣春農舍人詩丁卯橋邊偶泊船爲開幽徑敞芳筵注云庚寅過潤招飲椒馨閣王夢樓鮑雅堂同聚 楹書隅錄宋本大戴禮記潤州蔣氏藏書

韓非口吃著說林校讐七略似劉歆山河泡影談何易一見公羊涕不禁 紀文達昉

朱珪協辦大學士禮部尙書紀公墓誌銘嘉慶乙丑二月協揆獻縣紀公薨於位其冬公子汝傳孫樹馨來請銘按

狀公紀姓諱昫字曉嵐一字春帆晚號石雲乾隆甲戌進
士辛卯開四庫全書館公實總其成筆削攷核定爲全
書總目哀然巨觀又五老會詩文達一首云宗伯河閒
蛇口吃善著書沈浸四庫閒提要萬卷餘抑揚百代上浩
博衡錙銖是爲脈望蟬神仙吞丹符李文藻琉璃廠書
肆記鑑古堂韋氏頗曉事而好持高價予房師紀曉嵐先
生買其書費數千金文達閱微草堂筆記趙清常歿子
孫鬻其遺書武康山中白晝鬼哭何所見之不達邪余嘗
與董曲江言大地山河佛以爲泡影區區者復何足云我
百年後儻圖書器玩散落人閒使賞鑒家指點摩挲曰此
紀曉嵐故物是亦佳話何所恨哉又云嘗見媒媪攜玉

佩數事云某公家求售外裏殘紙乃北宋槧公羊傳四葉
爲惆悵久之

墨蹟何如薛尚功篋中打本一千通鞭笞犬豕庸非酷得失
何妨等楚弓 王昶德甫 王鳴韶鶴溪

漢學師承記王先生昶字德甫號述庵一字蘭泉又字琴
德江南青浦人乾隆甲戌進士官刑部侍郎 東湖叢記

王述庵司寇有一印云二萬卷書可貴一千通金石備購
且藏劇勞勩願後人勤講肄敷文章明義理習典故兼游
藝時整齊勿廢置如不材敢賣棄是非人犬豕類屏出族
加鞭箠述庵傳誠 鐵橋漫橐書初學記校本後嘉慶初
王蘭泉少司寇得宋板大字本余取徐本勘之得互異字

累萬 楹書隅錄宋巾箱本春秋經傳集解向爲青浦王
德甫先生所藏後歸揚州汪孟慈 錢大昕鶴溪子墓誌
銘君姓王氏名鳴韶字鶚起自號鶴溪子西莊光祿之弟
生平喜鈔書所收多善本 又跋薛尚功鐘鼎彝器款識
其墨蹟元時爲謝長源所得有周公謹趙子昂柯敬仲周
伯溫幹克莊達兼善王止仲諸人題此本乃明人就墨蹟
影鈔者故行款字體俱不失真舊藏虞山錢氏今爲王鶴
溪得之

鄭馬鴻都起遐靜千秋斷簡發龍威埽除脈望開吟舫一樹
椒花悵落暉

朱筠竹君

子錫庚少河

朱珪先叔兄墓誌銘公諱筠字竹君一字美叔號笥河順

天大興人考諱文炳生珪兄弟四人伯兄堂仲兄垣其次
公行五珪其季也乾隆甲戌進士改庶吉士散館授編修
以翰林院侍讀學士視學安徽時 上方詔求遺書

公奏言翰林院庫貯明永樂大典中逸書宜加采錄

上覽奏異之下軍機大臣議行 四庫全書得之大典

中者五百餘部皆世所不傳次第刊布海內實公發之也
公聚書數萬卷種花滿徑來請謁者不拒攷古著錄窮日
夜不倦卒年五十有三子二長錫卣次錫庚 又和竹君

兄詩前朝大典書萬部誰收整昌言陳 至尊清聽

元露警木天輻填咽鄭馬起遐靜斷簡發龍威高功題鳳
屏遂成千秋嘉何惜一官冷 又聞竹君叔兄歸寄懷詩

挾策亡羊忙底事埽除脈望曬書頻 又題椒花吟舫圖
椒花吟舫誰創修笥河先生此息游十年卉木手灌植一
時過從樊張儔又云少河抱書志肯構埽除三徑芟蕪蕪
椒馨花開一俯仰棠棣雖遠尙可求 先正事略先生子
錫庚字少河乾隆戊申舉人讀書好古精左氏春秋能世
其學 楹書隅錄宋本莆陽居士集有少河跋云乾隆庚
子之夏正陽門外不戒於火逼邇里居是書與家藏百衲
本史記倉猝中同爲胠篋持去余百計鉤稽始還青氈神
物護持定非偶然有大興朱氏竹君藏書之印笥河府君
遺藏圖書錫庚閱目椒花吟舫各印

識得單行吳志本不憂善眩等黎軒可憂可喜斯文種一老

愍遺天壤間

周錫瓚仲漣

子謝奩

昌熾案仲漣先生住閩門外馬鋪橋一號漪塘又號香嚴居士 士禮居藏書題跋記萃古齋送來吳志宋槧本始猶惜是未全之書及閱其目錄牒文自一卷至十卷分爲上秩十一卷至二十卷分爲下秩并載中書門下牒一通乃知此書非不全者汲古述古兩家書目皆載有吳志二十卷特世人不知耳明日訪海甯陳君仲魚借其津逮舫同至水月亭訪周丈香嚴香嚴識古書爲吾儕巨擘曰此爲專刻無疑未見書之必歸於讀未見書齋何巧乃爾相與談笑而別 又姚少監文集有翰林國史院官書朱印香嚴所得壬申五月十一日爲余五十賤辰以是書贈札

云尙是宋板宋印且有元官印可寶聊以當祝香巖喜藏
書今年已七十外知余有同嗜蹤跡甚密余每購一書必
往借所藏祕本證之二十年來可爲同志之友抱沖壽階
先後下世唯周丈與余一老一艾孜孜於故紙堆中尋活
計可喜亦可憂也又云己卯秋重展去香巖歿五月餘矣
昌熾案己卯爲嘉慶二十四年上距壬申又七年是香巖
之卒當踰八十矣 又開天遺事跋香巖季子謝庵出所
著羣書綴述相質萃元明以來人著述爲目錄以續貴與
經籍攷子晉之有斧季相去當不遠也 劉禧延研六齋
筆記跋吾吳藏書之富以朱氏黃氏爲最楓江周氏足與
之埒研六居士謝盦自其尊人漪塘已癖好聚書以故家

多善本錢辛楣段茂堂諸公常過從借閱至謝奩好之彌篤丹黃校勘無閒寒暑家且中落宋元槧本及精鈔祕本漸爲豪者餌去而餘籍尙夥所纂羣書綴述一百四十卷薈萃諸家論跋儲藏家一大掌錄也此則隨時筆記然所載已多罕見本宋君彩若近與有連以綴述一書工費稍鉅筆記卷帙無多尙易爲力先刻以傳庶謝奩一生輯錄之勤不至盡泯而宋君惓惓雅意已足多矣 昌熾案謝庵名未詳蕘翁跋學齋佔畢又云香巖作古書多分散兒孫藉先世寶藏聲名挾冊索重直然則香巖諸子不能盡賢其遺書亦卽散也

毛錢馮陸故家藏根腳籤題認舊裝紅豆再傳弟子列白蓮

小築丈人行

朱邦衡秋厓

姪奐文游

余蕭客仲林

士禮居藏書題跋記經典釋文同郡朱秋厓爲余言小阮文游有影宋鈔本昌熾案文游卽奐字也秋厓爲余蕭客高弟其傳錄國語惠校本自署小門生朱邦衡蓋以仲林爲松厓弟子也蕘翁太平御覽跋云朱丈文游與惠徵君棟爲莫逆交又顧千里諸書跋尾亦多稱文游爲丈則其輩行雖較秋厓爲幼而其齒必較長矣 顧廣圻題清河書畫舫常熟錢遵王毛子晉席玉炤陸敕先馮定遠曹彬侯各家書散出乾隆年間滋蘭堂主人朱文游三丈白隄老書買錢聽默視裝訂籤題根腳上字便曉屬某家某人之物 又張月霄書目序文游晚失厥嗣手斥萬籤較販

鬻家一出一入同歸於盡 吳門補乘余蕭客字仲林年
十五通九經聞有異書必假鈔錄同邑朱奐藏書甲吳中
館之滋蘭堂因得博覽手一編終夜不寢遂患目構一室
無窗戶上穴一方以通天光設修几書冊鱗次潛心研究
爲古經解鉤沈 先正事略蕭客別字古農讀書弗輟致
目疾人稱盲先生 昌熾案余見邦衡手錄述古堂書目
題乾隆庚子錄於白蓮里之靜怡小築

所見所聞所藏弄發凡眞有著書才安知散帙非全帙趕廟

驅車日又來 李文藻素伯

翁方綱李南澗墓表君諱文藻字素伯號南澗山東益都
人乾隆辛巳進士同知廣西桂林府事爲學無所不賅齊

魯聞藏書家自李少卿中麓王司寇池北書庫皆罕傳君
慨然以哀輯爲已任曰所藏書目曰所見書目曰所聞書
目皆詳其序例卷次誌其刊鈔歲月君年四十有九有三
子章郵章棉章姚 錢大昕李南澗墓誌銘南澗一字茝
畹性好聚書每入肆見異書輒典衣取債致之又從友朋
借鈔藏弄數萬卷皆手自讐校 南澗文集琉璃廠書肆
記乾隆己丑五月予以謁選居京師五月餘日借書鈔之
暇則步入琉璃廠觀書雖所買不多而書肆之不到者寡
矣又云內城隆福諸寺遇會期多有賣書者謂之趕廟散
帙滿地往往不全而價低朱少卿豫堂日使子弟物色之
積數十年蓄數十萬卷皆由不全而至於全蓋不全者多

是人家奴婢竊出之物其全者固在日日待之而自至矣
吾友周書昌遇不全者亦好買之予好書與書昌同不及
書昌能讀耳

清梵雲中傍柘提借書園在灤源西伏生孔鄭同堂祀兩漢

經師半魯齋

周子年書昌

桂馥周先生傳周子年字書昌濟南歷城人結茅林汲泉
側因稱林汲山人先生於衣服飲食玩好一不問但喜買
書有賈客出入故家得書輒歸先生凡積五萬卷先生見
收藏家易散有感於曹石倉及釋道藏作儒藏說約予買
田築借書園祀漢經師伏生等聚書其中招致來學 沈
起元題水西書屋藏書目錄後余來主灤源書院講席得

周生永年其文矯然其氣凝然百無嗜好獨嗜書歷下書
不易得生故貧見其脫衣典質務必得得則卒業乃已今
所藏經史子集二氏百家之書已數千卷皆能言其義

翁方綱林汲山房圖二首因山並寺託幽居對畫看山十
載餘清梵雲中出鐘磬浩歌風外荅樵漁芳菲百本仍開
圃悵望千秋更借書敬枕春明勞夢寐故鄉如此好林廬
鈔從館閣逮瞿曇中麓儲藏比未堪萬卷波瀾瀉瓶水千
峰結構到茅庵載書莫漫推池北名士從來屬濟南春雨
欲催農事起暮雲如畫點煙嵐 平津館鑒藏書籍記詩
話總龜晏元獻類要皆有林汲山房藏書傳之其人印
紙渝墨敗編帙墜一一都來讀易樓不著標題能目識心如

剝繭與蕉抽

玉棟筠圃

王芑孫讀易樓記吾友玉棟筠圃於今輦下爲藏書家讀
易樓其所貯書處也迺者作圖示余屬爲之記筠圃於書
無所不讀自其少小以逮宦游舟車風雨無一日暫廢聞
一書在某所雖千百里必宛轉得之而後已於是沈編墜
帙渝墨敗紙世所滅沒不經見者往往都來讀易樓中於
凡函幅之小大厚薄潢治之精斲敝好涉目便記造次抽
檢未嘗輒誤予過樓中怪其插架不著標題曰吾能目識
之也其好之之勤如此 又歲暮懷人詩玉筠圃大令棟
一首君家藏書甲輦轂豈伊藏之實能讀讀書無伴苦相
求襍被留君讀易樓樓前乍種梧桐樹恁恁出宰山東去

歸舟未得遠相尋半道留書寫我心自注云君有書邀余
紆道過其所宰之陽信縣翁方綱題筠圃讀易樓圖一
塵不爲託幽居自拓高窗日暴書萬卷瀾翻筌解外九師
閣束象滋初蠅頭細點研朱後塵尾清言屑玉餘彷彿郭
香碑篆在漁陽詩裏好林廬

夢陶回憶禮陶時搜遍中華此最奇亦似曇花開易落不禁
雙淚墮如縻

周春菴兮

杭郡詩輯周蓮字子同號玉井海甯人乾隆癸酉舉人注
云玉井家多藏書偕其弟春自爲師友皆以博學名開
有益齋讀書志海昌勝覽二十卷周春撰春字菴兮號松
齋晚號黍谷居士乾隆甲戌進士岑溪知縣嘉慶庚午重

赴鹿鳴卒年八十六有松靄遺書行世 海昌備志松靄
潛心著述所居著書齋終歲不埽除凝塵滿室插架環列
臥起其中者三十餘年四部七略靡不瀏覽 顧自修宋
刻陶詩跋武林鮑以文新倉吳葵里過松靄先生齋譚及
陶詩序末標湯漢不知何許人也先生便拍案稱好書且
告以宋史有傳文獻通攷著錄以文爽然若失隨叩陶集
攜行篋否則荅云送海鹽張芑堂矣重午先生卽從芑堂
借觀芑堂見書破碎而裝面用金粟箋疑爲祕冊索還甚
急賴張佩兼調停出葉元卿夢筆生花大圓墨易之重一
斤閱兩年而議始定蓋得之之難如此以文多方購覓丙
午始得一鈔本芑堂慙慙葵里重雕共懺悔覲面失宋刻

公案則此書之流通未始非先生功德也 又黃丕烈跋
湯注陶詩宋刻真本松靄與宋刻禮書並儲一室顏之曰
禮陶齋其書祕不示人欲以殉葬賈人吳東白談及周公
先去禮書改顏其室曰寶陶齋今又售去改顏其室曰夢
陶齋並聞他估云周去書之日泣數行下亦可想見其情

矣 楹書偶錄陶詩有周春松靄海甯周氏家藏著書齋

許奎掌文有題周松靄著書齋圖七律四首 松聲山房子孫世昌自謂是羲皇

上人內樂村農等印 陳增月墀遺橐周松靄師曇花館

所藏日本國人松貞文元泰古梅園墨譜歌如此遺編不
可尋濂溪夫子最淵深中華以外書搜遍第一人閒翰墨
林 又云長崎館外海雲稠造墨人還隔九州今日優曇

花下見勝他隨月讀書樓自注揚州江氏樓名樓藏日本
國人所著七經孟子攷文補遺

社散南屏寺裏鐘年華終賈騁詞鋒書船何似玉川子雪壓
短篷過五茸

汪啟淑秀峰

杭郡詩輯汪啟淑字秀峰號訥庵歙人官工部都水司郎
中注云訥庵寓吾郡小粉場顏其聽事曰飛鴻堂嗜古有
奇癖藏書百廚乾隆三十七年

詔訪遺書訥庵家

進呈六百餘種

恩賞古今圖書集成一部士林榮

焉少工吟詠當杭堇浦太史歸田之後與樊榭諸老結社
南屏訥庵以終賈之年騁妍抽祕進與諸老宿抗行其他
雜著有焯掌錄水曹清暇錄小粉場雜識 鮑廷博庶齋

老學叢談跋吾友郁君潛亭所貽也閒有誤書思之不適
聞某公有善本欣然借潛亭往借祕不肯宣是爲乾隆甲
午迨嘉慶甲子始據錢功父本一掃烏焉之譌往讀某公
所著清暇錄歷數近來藏書家而自述其儲蓄之富曾幾
何時已散爲雲煙矣昌熾案清暇錄當卽訥庵所著水曹
清暇錄訥庵做帚自珍誠爲可鄙然淥飲於身後作快心
之論亦非長者之言也 厲鶚樊榭山房集汪秀峰自松
江載書歸招同人小集分韻雪壓扁舟浪有稜載來書重
恐難勝排聯清興惟同鶴增長多聞似得朋歸洛舊傳東
野句入杭新並蓼塘稱銜杯不獨相欣賞欲賃鄰居翦燭
膽自注孟郊有喜盧仝書船歸洛詩 士禮居藏書題跋

記嘉慶辛酉秋坊閒收得汪秀峰家書內有五行類事占
三冊其紙皆明嘉靖時冊籍紙背閒可辨識 又續錄已
已春余爲武林之游上城隍山索觀古書於集古齋蓋其
主人在杭城書估中爲巨擘而去歲又新收開萬樓書也
鐵琴銅劍樓書目曲江集舊爲飛鴻堂汪氏藏書有新
安汪氏啟淑私印二朱記 陸心源周易爻變義蘊跋有
新安汪氏朱文方印啟淑私印朱文方印蓋開萬樓舊藏
也

謁者陳農訪異書山巖屋壁或藏諸千山來兩留住佳話未到
青陽博士廬 周厚堦仲育 沈紹賓廷作

四庫提要乾隆三十九年奉

上諭進書百種以上

如江蘇周厚堦蔣曾瑩浙江吳玉墀孫仰曾汪汝璩以及
朝紳中黃登賢紀昀勵守謙汪如藻等俱藏書舊家著每
人賞給內府初印之佩文韻府各一部俾珍爲世寶以示
嘉獎 松江府續志周厚堦字仲育婁縣人諸生家千山
下高才淹雅工詩嘗攔摭千山璪事成竹枝詞百首其先
世與趙松雪諸名人交富藏書乾隆中開 四庫全書館
厚堦進書數百種 賜佩文韻府 御製石刻

又 御筆題詩於其所進宋本兩漢博聞上皆異數
也厚堦敬取 御製詩中來兩字名其書樓王昶爲
之記 又沈紹賓字廷作華亭人學士粲九世孫由明經
官青陽訓導博學工詩古文藏書五萬卷皆手自評閱年

七十四卒著有月澹山房藁

羽陵姓字

九重聞闕史

題詩

帝右文正是夕陽無限好白頭攜杖拜

卿雲 鮑廷博以文

嘉興府志流寓傳鮑廷博字以文本歙人以商籍生員寄

居桐邑青鎮之楊樹灣 阮文達知不足齋鮑君傳

高宗純皇帝詔開四庫館采訪天下遺書鮑君廷博集

其家所藏書六百餘種命其子士恭由浙江進呈既著錄

矣復奉

詔還其原書唐闕史及武經總要皆

聖製詩題之嘉慶十八年方公受疇巡撫浙江奉

上問鮑氏叢書續刊何種方公以第二十六集進奉

上諭鮑廷博年踰八旬好古積學老而不倦著加恩
賞給舉人俾其世衍書香廣刊祕籍亦藝林之勝事也元
案君又號淥飲世爲歙人父思詡攜家居杭州君以父性
嗜讀書乃力購前人書以爲歡既久而所得書益多且精
遂哀然爲大藏書家自乾隆進書後蒙

御賜古今

圖書集成伊犁得勝圖金川圖疊膺

異數

褒獎彌隆君以進書受

主知謂諸生無可報稱乃

多刻所藏古書善本公諸海內至嘉慶十八年年八十有
六所刻書至二十七集未竣而君以十九年秋卒 翁廣

平鮑淥飲傳先生世居歙之西鄉父母相繼卒於杭乃卜
葬於湖州烏程縣某鄉後遷居桐鄉縣之烏青成今爲桐
鄉人也生平酷嗜書籍每一過目卽能記其某卷某葉某
譌字有持書來問者不待翻閱見其板口卽曰此某氏板
某卷刊譌若干字案之歷歷不爽 又 賜書堂記

高宗純皇帝賜古今圖書集成先生旣拜受是書
闕堂三楹分貯四大廚顏其堂之額曰 賜書 朱

文藻知不足齋叢書序吾友鮑君以文築室儲書取戴記
學然後知不足之義以顏其齋君讀先人遺經益增廣之
令子士恭復沈酣不倦君字之曰志祖蓋嗜書累葉如君
家者可謂難矣三十年來近自嘉禾吳興遠而大江南北

客有舊藏鈔刻異本來售武林者必先過君之門或遠不可致則郵書求之浙東西諸藏書家若趙氏小山堂汪氏振綺堂吳氏瓶花齋汪氏飛鴻堂孫氏壽松堂鄭氏二老閣金氏桐花館參合有無互爲借鈔至先哲後人家藏手澤亦多假錄得則狂喜如獲重貨不得雖積思累歲月不休余館於振綺堂十餘年君借鈔諸書皆余檢集君所刻書余嘗預點勘余與君同嗜好共甘苦君以爲知之深者莫余若也 定香亭筆談以文嘗爲夕陽詩盛傳於時人呼爲鮑夕陽余贈以句云清名卽是長生訣當世應無未見書何處見君常覓句小闌干外夕陽疏 昌熾案以文二孫長曰正言次曰正字見皕宋樓藏書志所載泣蘄錄

跋又自號通介叟其玉壺清話跋題乾隆庚子識於寶繪堂著有花韻軒詠物詩存 拜經樓藏書題跋記霏雪錄 淶飲所貽有世守陳編之家老屋三間 賜書萬卷

歙西長塘鮑氏知不足齋藏書印三圖記

青桂連蜷覆畫檐隔窗碧色上牙籤流光明月還如昨不見

懷民與子瞻

郁禮佩先

鮑廷博庶齋老學叢談跋右老學叢談楷書精整出自錢唐汪西亭氏吾友郁君潛亭所貽也 又附記郁君名禮

字佩先潛亭其自號也錢唐諸生家世素封儲書充牣潛亭又增益所未備成鉅觀焉時小山堂趙氏藏書業已散佚所餘殘帙尙多異本君悉力購之家在城東去厲徵君

樊榭山房不一里傳錄其祕冊尤多徵君歿其家出所著
遼史拾遺手彙君以四十金購焉中間缺五十紙百計求
之不得一日余步至青雲街見拾字僧肩廢紙兩巨簏檢
視之皆厲氏所棄徵君平日掌錄遼史遺事在焉亟市以
歸紛如亂絲一一爲之整理適符所缺若有鬼物陰相之
者事亦奇矣君恂恂儒雅尤與予暱無三日不相過過必
挾書而來借書以去雖寒暑風雨不爲少閒藏書東嘯軒
軒額董香光所書庭前古桂二樹相傳明萬厯閒所植交
柯接葉清陰覆檐室中牙籤萬軸都成碧色君馮几校錄
晨夕不休經其庭闥如也花時每招余信宿其中香鑪茗
椀婆娑竟日更深月上兩人徘徊花影下彷彿東坡與張

懷民承天寺之游自予移家烏戍遂無復有此樂矣君棄
世不數年鄴架曹倉漸就零落主人避客塵榻空懸想惟
舊時明月流光碧樹閒耳古嚴誠九月朔日郁佩先招集
東嘯軒看桂分韻得軒字連蜷青桂樹涼影滿東軒半畝
勢疑壓三秋香始繁

飈輪石火百年身遺蛻空悲古逸民不見蒼梧二姚返蹇修

我欲託靈均

姚瑚古香

姚虎臣

陌宋樓藏書志古逸民先生集鮑以文手跋曰是集藏書
家未有蓄之者吾友錢唐姚君古香得之親串亂帙中好
事者因爭傳錄未幾古香暴卒使先一年此書無從蹤跡
矣古香名瑚藏書多祕冊與予交最善卒時年止三十餘

嘉慶甲戌六月通介叟時年八十有七士禮居藏書題
跋記梅花百詠傳本絕少此本出杭人姚虎臣家陳仲魚
爲余購者今虎臣已故仲魚亦旋舊里好古之友無一二
人誰爲之助余發憤邪

恍有金絲孔壁聞青樵積雨潤苔紋牙籤已溢章邱筭何論

琳琅金薤文

孔繼涵補孟

翁方綱孔君墓誌銘君諱繼涵字體生一字補孟號洪谷
曲阜人至聖六十九世孫乾隆辛卯進士官戶部主事告
歸養母歿年四十五君雅志稽古於天文地志經學字義
算數之書無不博綜官京師七年所手校者數千百帙集
漢唐以來金石刻千餘種悉攷覈其事與經義史志相比

附遇藏書家罕傳之本必校勘付鈔以廣其傳所著名紅
欄書屋集 又過漢谷齋同觀石鼓文舊拓本積雨青櫺
潤苔花似古文我來循孔壁不屑較秦斤自注青櫺漢谷
齋名 又送孔漢谷農部請養歸曲阜敏捷鈔書手優閑
奉母身歸當仍壯歲行及小陽春日下編初葳章邱笥更
新牙籤精點勘勿笑北方人自注朱竹垞云李中麓所儲
書籤帙點勘甚精北方學者能得斯趣殆無多人今漢谷
鈔藏之富已過中麓矣昌熾案余在嶺嶠見卽亭侍郎所
得宋元人集如周紫芝太倉稊米集陳基夷白集凡數十
種皆微波榭鈔本漢谷先生以朱筆點校閒有跋語知覃
溪之言爲不虛也

瀑直承明舊有廬移家新賃廠東居紅橋花事休相憶日日

攤錢問故書

程晉芳魚門

袁枚翰林院編修程君墓誌銘君名晉芳字魚門一字鼐
園祖居新安治鹽於淮父遷益生子三人長原衡季述先
君其仲也乾隆初兩淮殷富程氏尤豪侈多蓄聲色狗馬
君獨好儒罄其貲購書五萬卷招致方聞綴學之士與共
討論癸未 天子南巡召試第一 賜中書舍

人再舉進士未幾開 四庫館君爲纂修授翰林院編修
死年六十七先嗣子瀚後生子溧 昌熾案館選錄程晉
芳乾隆辛卯進士 翁方綱程先生墓誌銘君有桂宦書
目若干卷桂宦者君讀書室名家素饒於財自少至壯積

書三萬餘卷中年以後家落而書亦稍散失矣然其豪氣
猶不減其家全盛時君諱晉芳初名廷鑽 藤陰雜記廠
東門內一宅相傳王漁洋曾寓近程魚門移居以詩寄袁
太史枚有勢家歇馬評珍玩冷客攤錢問故書之句 顧
宗泰懷師友詩程戡園一首云春日看花淮浦舟紅橋袂
飲又句留多君終遂平生願得入承明掌校讐

銅雀葳蕤鎖二喬各攜寫韻降文簫范張鉤黨今除籍好問

東倉第幾橋

陸時化潤之

金元功

王昶國子監生陸君潤之墓誌銘君諱時化號聽松潤之
字也太倉州人國子監學生祖毅康熙戊辰進士官陝西
道監察御史父恬太學生君嗜法書名畫精鑒別嘗集生

平所見數百種記其紙絹詳其行款識者比之退谷江村
兩銷夏錄又聚書萬卷購善本而手校讐之以貽其後裔
乾隆四十四年病歿年六十有六子一愚卿克承其家

又云予昔讀常熟毛清傳稱清以孝弟力田起家有幹識
儲書數萬卷甲於東南是以子晉舉而刻之迄今汲古閣
書盈天下而晉三子咸著文譽今君憲藏圖籍書畫愚卿
廣收博貯不減於子晉且以淑其三子視毛氏之祖孫何
其前後同揆歟 嚴可均書明刻太平御覽後張天如先
生曾孫語余曰先高祖有宋刻本御覽千卷先曾祖分授
二女作嫁裝各得五百卷今但問陸願吾可以就校願吾
卽先祖姑之孫陸時化字潤之號聽松之子住太倉州西

門內大橋東石皮弄口路北 士禮居藏書題跋記耕學

齋詩集十二卷曹潔躬藏本適書友以東倉陸時化手鈔

唐宋元明人集求售內有是集留之校對一過 前塵夢

影錄先君秉鐸婁東在道光初元其時翠華軒陸氏收藏

未盡散失香來茂才以其曾祖時化家刻所見書畫錄爲

贄 鐵琴銅劍樓書目道德寶章有陸潤之嘯雲軒朱記

又國策太倉陸氏藏本卷首有潤之所藏朱記楚詞舊爲

太倉陸氏藏書卷首有陸時化印聽松老人二朱記又陳

伯玉集有金元功藏書記深柳讀書二朱記昌熾案元功

亦太倉人士禮居著錄新定續志卽其舊藏持靜齋書目

艾軒集有金元功藏書記金氏南樓書籍二印其他印識

見於各家題跋者尙多其藏弄之富可知附見於此

晏坐花南水北亭文園銷渴爲虹屏人獲價貴踰珠琲好爲

神農補本經

陸烜子章

沈采虹屏

兩浙輜軒錄陸烜字子章一字梅谷又號巢雲子平湖人
徐熊飛曰先生弱冠受知於諸城寶少宰後棄諸生隱居
胥山邱爲里作巢雲子傳見志沈文恪公主敷文講席撫
軍屬其采錄遺書乃引先生爲助校勘甚精 東湖叢記
梅谷刊奇晉齋叢書收藏甚富嘗見書估攜來中統本史
記後有梅谷跋侍兒虹屏書有梅谷掌書畫史沈采虹屏
印記又晏公類要後有虹屏跋云晁氏郡齋讀書志謂六
十五卷焦氏經籍志謂八十卷而此僅三十七卷然其中

有公四世孫表補闕至歷代雜錄止蓋已爲足本矣曾南
豐集有此書序爰錄冠首時乾隆辛丑四月十二立夏日
是歲閏五月春事未闌海棠繡球木筆紫荆薔薇花尙繁
盛新妝初畢御研綾夾衣晏坐花南水北亭啜鏡溪新茗
書眞藏書家韻事也 梅谷隨筆凡治定書必用雌黃其
色久而不渝余嘗見李獻吉評杜詩錢牧翁手批元遺山
集皆手澤如新修補古書漿黏中必入白芨則歲久不脫
近購得宋余靖武溪集趙璘因話錄施彥執北窗炙輠皆
汲古閣物裝訂極精緻而於破損接尾處皆脫蓋不用白
芨之故亦藏書家所當知也 又梅谷人參譜序余得怔
忡疾醫者曰非人參不可顧近日遼參貴踰珠琲貧家安

所得此因徧覽書幾百種披閱手鈔稍加論列不十日譜成而病若失乾隆丙戌重陽前一日

槐市塵封有做廬半生飽食武昌魚歸來嘆喏摩昏眼充棟

雲煙付太虛

吳翊鳳伊仲

道光蘇州府志吳翊鳳字伊仲諸生於學無所不窺卒年七十八中歲應湖南巡撫姜晟之聘繼主瀏陽南臺書院昌熾案枚庵乾隆三十一年曹宗師歲試入吳縣學見三邑諸生譜戴延年搏沙錄枚庵名翊鳳吳縣人酷嗜異書無力購致往往從人借得露鈔雪纂目爲之眚又秋鐙叢話梅菴貧而工詩閒留心設色余贈詩云兒童報道晨煙斷餘事青山換米來蓋實錄也老屋一椽僅蔽風

兩所居干將里 吳壽暘贈枚庵詩槐市幽棲比鶴巢高
風幾爲俗情滄自注先生居吳之槐樹街 拜經樓藏書
題跋記伊仲本休甯商山人僑居吳郡家貧而好書與朱
文游爲莫逆交手鈔祕冊極多予至金閶必爲留連日夕
得佳本輒互相傳錄後應姜度香中丞之辟挈家入楚郵
筒不接者十載聞其書亦皆散失矣 王芑孫題吳枚庵
明經借書圖詩君昔富搜羅藏家所爭詫偶食武昌魚儻
然皆羽化晚歸空四壁往夢付爍喙雖無千金市幸可一
甌藉久亡憶之頻驟得喜如乍昏鐙摩老眼積漸仍滿架
圖成應自哂茲身亦傳舍 黃丕烈洞天清祿集跋枚庵
久客楚中舊藏書籍寄貯親友所者半皆散逸 又文房

四譜跋枚庵久而不歸故親友無忌憚而爲此也愛日
精廬藏書志游記續編有鮑以文跋曰枚庵書法秀逸手
書祕冊幾及千卷今之錢罄室也一旦化爲煙雲其歸也
蓋有大難爲懷者矣昌熾案枚庵子號晉齋見士禮居
沈下賢文集跋其藏書印一曰枚庵流覽所及一曰吳翊

鳳家藏文苑其書亦皆所失矣王昌齡跋吳外

爲慕一廛藏百宋更移十架度千元生兒卽以周官字俾守

楹書比孝轅吳騫槎客
昂駒醒園
子壽陽虞臣
春煦子撰孫之淳鱸鄉 姪

海昌備志吳騫字槎客號兔牀家新倉里篤嗜典籍遇善

本傾囊購之弗惜所得不下五萬卷築拜經樓藏之晨夕

坐樓中展誦摩挲非同志不得登也得宋本咸淳臨安志

九十一卷乾道志三卷淳祐志六卷刻一印曰臨安志百
卷人家其風致如此子壽照字南輝號小尹乾隆丙午舉
鄉試壽暘字虞臣槎客以宋槧東坡先生集授之因自號
蘇閣取拜經樓書有題跋者手錄成帙爲題跋記虞臣子
之淳諸生亦能守遺籍校讀不倦海昌百年來藏書家若
前步橋許氏之惇敘樓今遺籍蕩然樓亦毀矣胡陳村胡
氏華鄂堂所藏僅有存者獨拜經樓完好無恙賢子孫善
守之效也昌熾案兔牀先生一字葵里之淳號鱸鄉 虞
臣題東坡先生鹽官縣絕句殘碑云扁舟載過蘇閣中醮
鶴芸編日爲伍自注云家君得宋槧百家注東坡先生集
因名藏書處曰蘇閣蓋先以蘇詩名其閣繼卽以閣名字

其子也 東湖叢記黃蕘圃主政百宋一廬吳兔牀明經
以千元十架相敵故老風流猶令聞者色飛眉舞昌熾案
拜經十架諸家所記皆作插架之架獨蕘圃席上輔談跋
云余藏書所曰百宋一廬海昌吳槎客聞之卽自題其居
曰千元十駕謂千部元板遂及百部之宋板如駑馬十駕
耳潛研老人十駕齋養新錄卽此十駕之義其字作駕且
從而爲之辭蕘翁同時同好不知何以傳聞異詞也 拜
經樓藏書題跋記周禮宋刻二十卷陳簡莊跋云槎客得
此書時適生次君虞臣故其小字曰周官 又管庭芬跋
兔牀先生祖籍休甯流寓尖山之陽博綜好古纂述宏富
拜經樓之藏弄足與道古得樹二家後先鼎峙嘉慶癸酉

先生年八十一下世蘇閣父子保守遺籍累世不怠亦自來藏書家所難能也世彙書雜記吳春煦字子撰兔牀先生之姪孺染家學校讐極精審其兄醒園昂駒亦好古籍棲里書堂吳越郊芋魁徑尺養寒庖洞天清祿眞銷受香雪梅花處士巢宋大樽左彝

兩浙輶軒錄補遺宋大樽字左彝一字茗香仁和人乾隆丁酉舉人官國子助教著有學古集王宗炎爾雅新義序宋山陰陸氏爾雅新義爲世所罕觀吾邑陸君芝榮陳君培得仁和宋助教大樽手校本審定鏤板嚴元照書手錄雲煙過眼錄後自武林歸經塘棲里訪宋茗香觀所藏書中有丁龍泓先生手鈔雲煙過眼錄一冊東湖叢

記焦弱侯家精鈔洞天清祿集宋茗香助教所得舊籤隸
書五字類文待詔古香可愛馬廷枏贈宋茗香助教詩
辛苦風塵兩載餘攤書盡日對窗虛棠梨晷影分明在遙
憶先生國子廬陸素生贈宋茗香詩我言君豈是梅精
雙眉瘦過梅根節清辭妙緒出無窮何似霏霏落香雪又
言君返超山麓自采梅花煑香粥我家芋魁養徑尺煨火
旋煨腴勝肉小隔百里便往來如共山窗聽風竹

舊槧書沿唐諱筆古銅範自蜀中鑄新篁大樹何須問霄漢

胎禽總列仙

張燕昌文魚

張廷濟叔未

張廷濟桂馨堂集感逝詩文魚兄名燕昌字芑堂手有魚
文因號文魚又號金粟山人海鹽人祖居大樹村與篁里

近傳是同族而譜系不可攷乾隆丁酉科優貢生嘉慶丙
辰薦舉孝廉方正甲戌卒年七十七詩云獨有昂藏鶴風
姿似列仙論文金石契話舊孝廉船 又篁里紀事詩江
村十里徧篔簹是處天開水竹鄉多少趁墟筠徑裏新行
里合號新篁 燕昌金粟箋說藏經都宋人書亦有沿唐
諱缺筆者如愍偏旁民字缺末筆余居京師嘗以一本贈
北平翁學士學士賦詩爲報云愍字尙沿唐諱筆我嘗證
以宋槧書 金楷贈張文魚徵君詩金粟山中叟蕭閒話
古懽書搜秦火臙篆補禹碑殘 士禮居藏書題跋記十
一月朔往候海鹽張芑塘芑塘愛古年已七旬所見古書
甚多與長塘鮑淥飲相友善 東湖叢記新篁張叔未文

藏有古銅一片上楷書反刻易奇而法詩正而葩春秋謹
嚴左氏浮誇十六字凡四行四字爲一行未翁題爲書範
有自跋云此初刊書時鑿銅爲式以頒示匠者之物也韓
文始鐫於孟蜀歐陽子書後云文字刻畫頗精於今世行
本則此爲孟蜀敕刊韓集時鑿銅爲式可知也 莫氏宋
元舊本書經眼錄皇朝仕學規範四十卷宋淳熙本有清
儀閣張叔未廷濟印叔未題其首日乾隆時武陟令查宣
門開所珍貯者嘉慶時余從宣翁之子棗庵秀才購得道
光二十五年乙巳七月二十日嘉興竹田里七十八歲老
者張廷濟叔未甫

商瞿一經可傳子先生雖死猶不死道家何處有蓬萊卽在

蘇門百泉裏

汪中容甫

子喜荀孟慈

錢儀吉汪孝子墓表江都汪孝子諱一元字兆初縣學增
廣生父良澤病卒明年又遭母喬憂遂以毀卒妻鄒煩捫
苛苑教成其子中鬱爲通儒有孫喜孫惇至勤學 劉逢

祿禮堂授經圖記予友汪子孟慈旣撰次其先人述學之
書而復屬屠琴鳴氏系之以授經圖且哀而言曰喜孫年
六歲先人寫定皇象本急就篇管子弟子職教授於禮堂
嘗謂友人商瞿生子一經可遺惜旦暮入地不及見其成
立耳 又云先生晚而得子慮爲俗學所囿乃自次其藏
書數萬卷畀之 楹書隅錄宋本毛詩先公於己酉購之
揚州汪容甫先生家 又宋巾箱本春秋經傳集解向爲

青浦王德甫先生所藏後歸揚州汪孟慈太守道光己酉先公於太守之子延熙處得之有周玉齋金漢石之館喜孫校本汪延熙印諸朱記 又宋本周禮十二卷有江都汪氏問禮堂收藏印汪大喜孫喜孫祕笈汪延熙印汪介徽印諸朱記 昌熾案孟慈先生後改名喜荀曾見陳碩父先生朋舊尺牘一冊中有先生書十餘通甲辰以後皆署喜荀其一通云江浙人文甲於天下近儒學業度越元明欲藏書奎文閣或置之蘇門百泉招徠天下書賈廣求異書以垂後世又一通後附訪求書目自宋刻經史以逮近儒撰述凡數十種又一通欲求顧澗翁思適齋筆記爲之流傳

酒杯笑擲醅顏紅揮手千金做屣同賸有桐華賓主意寫將
香草寄童蒙 金德輿鄂嚴

昭代名人小傳金德輿字鶴年號雲莊又號鄂嚴桐鄉人
官刑部主事善書精鑒藏有桐華館詩鈔 嘉興府志雲
莊檀從孫七歲能詩乾隆庚子 聖駕南巡進宋槧

書籍 賜文綺補刑部奉天司主事校正東觀漢記

諸書八種名曰史翼刊以行世 楊蟠文瑞樓書目序金

明經星軺文瑞樓書目鈔自明經從孫鄂嚴比部爲桐華
館訂正之本比部博雅好古可繼明經之流風 士禮居

藏書題跋記離騷集傳宋本孫延跋云桐鄉金氏所藏卷
端畫蘭一幀方檇盒筆檇盒舍於金氏桐華館主賓相契

脫略形迹綴此數筆其殆同心之臭歟 錢儀吉跋方蘭
坻墨筍卷方處士時館金比部鄂嚴華及堂今四十年矣
處士眞筆日尠卽華及之圖書彝鼎亦皆煙雲四散 李
貽德六哀詩金鄂嚴比部一首兩峰高高避債臺歲暮逼
人西湖來徧借金錢給寒士春風仍使梅花開朱提手揮
十四萬廣廈無際生平願死後盡發篋中藏百二十紙賒
米券 鮑廷博悼鄂嚴詩誓向西湖畢此生無端一語我
心驚老輕書畫兼金值死避窮愁兩字名詩卷新排甯有
意酒杯笑擲已無聲電光石火須臾景除是斜陽寫得成
自注云藏弄書畫法帖數千金晚年脫手散去不計值也
又云方與余晚酌燭未見跋把杯一笑而逝

乞得神仙三字靈上清丹竈共延齡文章太守清寒甚那有

三閒柏木廳

張敦仁古餘

張徵齋

國子監進士題名碑張敦仁澤州府陽城縣人乾隆四十三年戊戌科二甲二十三名進士 顧廣圻與古樓記陽城張觀察古餘早年成進士仕宦五十載其居官也不激不隨進未有不難退未有不異階級方轉而懸車蹈禮其立身之古也百行備修恂恂訥訥不買名聲於天下而閭然日章其爲學之古也高明廣大無所不通老而不肯廢書自佚儒行之篇不云乎儒有今人與居古人與稽今世行之後世以爲楷先生有焉斯樓之所以名也樓在先生僑居秣陵之中正街宅東北隅云 彭兆蓀揚州郡齋雜

詩維揚劇郡雄財賦太守清寒似我曹絕學九章都探徧
只輸能吏算錢刀牙籤壓架萬琳琅官閣新開六一堂我
有貪心同脈望神仙三字要分嘗自注古餘太守藏書最
富於郡廡東偏葺六一堂奉歐陽公象而儲圖籍其中設
小史掌之何紹基金陵雜述詩古餘張子舊庭階瑜珥
瑤環韻自佳插架遺書多易米芬留翠墨在吾齋自注每
到張家書聲盈耳然遺書盡散吾得其金石拓數種又
貞白燒丹有舊邱張郎觴詠劇風流三閭柏木廳猶在可
惜藏書轉角樓自注陶谷主人張徵齋藏書甚富今餘柏
木廳址楹書隅錄影宋鈔儀禮要義有張敦仁讀過文
章太守二朱記昌熾案其藏書印又曰陽城張氏省訓堂

經籍記

沖虛先傳處度注因可亦草潛夫箋精亡脈極遠長往興言
宿草空泣然

王宗炎穀塍
繼培因可

王紹蘭南陔

陳春東爲

汪

沈豫補今言蕭邑藏書之富穀塍王經師家築十萬卷樓
陸氏寓賞樓陳氏湖海樓此外如王中丞南陔汪吏部蘇
潭俱大族皆充棟盈車不假南面百城至讐校精工分晰
眞僞王汪諸君皆精於鄭孔小學非炫飾斯文徒誇排比
者可擬也 昌熾案王宗炎原名瑛乾隆四十五年庚子
科二甲進士見國學題名記 陳春湖海樓叢書序春資
識禱昧粗習章句邨居僻左尠所聞見蓄疑未達則求教
邑中有道之士得以讀其所藏之書於汪吏部蘇潭尤契

洽也吏部家富圖籍而搜訪不倦每得善本舉以相示家君高年耽寂自號沖虛七十生朝吏部持手校列子張注爲壽春梓印以呈家君輒然色喜進一觴焉春由是益思流布祕籍以爲親娛謀之吏部先擇攷證經史有裨實用者次第寫板吏部方箋釋鹽鐵潛夫二論鈎稽乙注眇極繭絲復爲春校定所刊書一字之誤繙檢累夕精亡脈極遽爾殂謝春連遘閔凶迷罔廢業追維承顏介壽之樂良朋賞析之雅歲月幾何已殊今昔興言及此況也才歎王紹蘭潛夫論箋序潛夫論久無善本求是去非蓋其難也吾友汪主事因可績學超奇通心而敏會萃羣刻網羅佚聞草創於嘉慶己巳庚午閒時紹蘭讀禮家居辛未服

闕握手河梁鄭重而別忽忽者七八年紹蘭奉職無狀罷官歸而因可墓有宿草鍵戶省愆故人長往庭蒿門雀不復聞空谷足音矣一日陳子東爲告以因可書已代謀劄劄受而讀之竊悲因可豐於學嗇於年又喜其能以書自延其年東爲能行其書以延其年斯可貴也

短卷東趨積水潭古梅花下結詩龕一心供養詩千卷莫作維摩古佛參

法式善開文

先正事略先生名法式善字開文號時帆蒙古正黃旗人乾隆四十五年進士官侍讀自登仕版卽以研求文獻宏獎風流爲己任在詞館著清祕述聞槐廳筆記在成均著備遺錄所居在厚載門北明西涯李文正公畏吾村舊址

也有詩龕及梧門書屋藏書數萬卷蒔竹數百本寒聲疏影翛然如在巖壑閒 翁方綱陶廬雜錄序法式善梧門撰梧門姓孟氏內府包衣蒙古世家原名運昌以與關帝號音相近 詔改法式善法者國語奮勉也 又云

梧門刻意爲詩多蓄古今人集以詩龕題其書室又以陶廬自號 又跋梅礪詩話宋末吳興韋居安撰厲樊榭云全集不傳僅於天一閣借鈔此冊世閒知者罕矣今歸梧門詩龕 陶廬雜錄十年前余正月游廠於廟市書攤買宋明實錄一大捆雖不全之書究屬祕本未及檢閱爲友人攜去至今悔之又得宋元人各集皆牙樂大典中采入四庫者宋集三十二種統計八百二十三卷外附廬山集

五卷元董嗣杲撰英溪集一卷不著撰者姓氏書寫不工
似未及校對之本余惟物少見珍什襲藏之有人許易二
千金靳弗予也 王芑孫題法時帆員外詩龕圖鳳城北
出橫一衢短巷曲折從東趨巷側板扉君所居入門而左
潔埽治瓦屋數楹花幾枝不龕古佛龕以詩 聽松廬詩
話但有梅花看何妨長閉門地偏車馬少春近雪霜溫老
剩書藏篋貧餘酒在樽說詩三兩客往往坐鐙昏此梧門
學士詩也蕭寥澄澹如見其人

道廣平生似太邱綠窗還共布衣游目光髯影看飛動細字

黏籤在上頭

丁杰升衢

錢馥廣伯

翁方綱丁小正傳丁杰字升衢號小山又號小正浙江歸

安人乾隆辛丑進士官甯波府學教授嘉慶十二年二月
卒年七十子授經傳經皆能世其家學君北學齋在京師
宣南坊與子對門而居無日不相過從共几展卷審正罅
漏每竟一編校籤細字壓黏倍其原書皆目光髯影栩栩
飛動處所定 桂未谷詩集有客不識丁杰姓名口占一
首云木火相扶信五行遂教雁塔表新名丁因有尾無人
識劉向原來是更生自注歸安丁錦鴻久困場屋日者占
運謂須木火相扶因改今名果登第 許宗彥丁教授傳
教授在都十年聚書至數千卷手寫者十二三爲學長於
校讐得一書必審定句讀博稽他本同異用小紙反覆細
書孫侍御嘗謂曰君書頗不易讀遇風紙輒四散不可詮

次奈何 海昌備志錢馥字廣伯號慢亭世居路仲里嘗
取濂溪詩意自號綠窗於是遠近以綠窗布衣目之自題
所居曰小學齋年甫四十而歿門人錢唐邵書稼爲訂遺
藁 拜經樓藏書題跋記歎堂集古錄先君子跋云丁升
衢進士見而借校原本卒未見歸也踰年詢諸丁君乃從
盧弓父學士求此本以還予開卷視之所補序跋及校字
皆依予筆而書則非予原本蓋升衢交道最廣嗜古尤癖
予之原本展轉傳錄不知落誰氏之手矣 又廣韻五卷
錢綠窗處士手校 又字鑑二冊錢綠窗處士校本先君
子識後云廣伯生平精究小學所校正字鑑及郭氏汗簡
予昔嘗從之借鈔今廣伯既歿遺書盡散予偶見苕賈攜

示數種皆手澤宛然每一披對不禁泫然 又樂記逸篇
丁小正跋題丙午二月記於巖寺鎮之鷗先草閣

沈湘爲我謝彭威廉石歸裝穩布帆一榭五松相對峙名山

占盡積書巖

孫星衍伯淵

阮文達山東糧道孫君傳君諱星衍字淵如江蘇陽湖人
父勳河曲知縣君乾隆丁未一甲第二賜進士及第授編
修散館改主事官至山東督糧道勤於著述性好聚書聞
人家藏有善本借鈔無虛日金石文字搨本古鼎彝書畫
靡不攷其源委有孫氏家藏書目內編四卷外編三卷
姚鼐題淵如觀察萬卷歸裝圖詩自興雕板易鈔胥市冊
雖多亂魯魚君自石渠繙七略復依官閣惜三餘世推列

架皆精本我願連牆借讀書政恐衡山承召起牙籤三萬
又隨車 陳宗彝廉石居藏書記序丙申二月訪陽湖孫
公子竹床於五松園假歸廉石居藏書記一卷爲其先淵
如先生遺書也先生官山東糧儲時有平津館鑒藏書籍
記四卷此題廉石居五松園額也曩偕陽城張公子小餘
觀治城山館樓上藏書五楹冊首各有手書題記今竹床
昆仲分藏虎邱一榭園金陵五松祠閒有散佚 前塵夢
影錄庚申吳城陷後越二年虎邱山寺見一室亂書堆積
搜之頗有善本如范文正事跡祇二十餘葉字悉吳興體
未有孫淵翁題跋黃蕘翁三跋淵翁云此等元大德延祐
本直欲駕於宋刻尋常本之上紙堅白而極薄墨色如漆

寺中一僧目不識丁余以賤價購之書之首葉皆有印記
知爲一榭園中所度今則池館樓臺鞠爲茂草非佛家所
云壞劫歟 昌熾案廉石居藏書記會稽章氏刊入式訓
堂叢書平津館鑒藏書籍記三卷續編一卷補遺一卷李
木齋同年刊於廣陵祠堂書目先生自刊入岱南閣叢書
余見元本顏氏家訓有先生跋云過南陽湖舟覆書數十
簾俱沈溼顧千里告予何義門家藏書亦皆沈水此有義
門跋蓋兩經水厄矣其藏印曰東方廉使曰東魯觀察使
者曰孫忠愍侯祠堂藏書

賓客淮南比小山玉臺搗染到慈鬢空談龍脯終揮斥陸賈
裝空粵海還 秦恩復敦夫 江藩子屏

先正事略秦恩復字敦夫一字澹生江都人乾隆丁未進士官編修讀書好古所居玉笥仙館蓄書萬卷丹鉛不去手校刊陶宏景鬼谷子注盧重元列子注及隸韻諸書昌熾案秦氏所刊尙有李軌揚子注奉天錄唐駱賓王李元賓呂衡州諸集享帚精舍詞學叢書 顧廣圻石研齋書目序廣圻今年獲識敦夫先生入石研齋觀所藏祕笈并示以新編書目上下二卷尋覽既周歎其體製之善也蓋由宋以降板刻眾矣同是一書用校異本無弗復若徑庭者每見藏書家目錄經某書史某書云云而某書之何本漫爾不可別識今先生此目創爲一格各以入錄之本詳注於下旣使讀者於開卷閒目瞭心通而據以攷信遂不

啻燭照數計於是知先生深究錄略得其變通隨事立例
惟精惟當也 又江都秦太史姬人端木氏墓誌銘公名
之曰守柔字之曰慈鬢玉臺或列奇書金屋每張寶繪纔
經濡染卽若肄嫻 江藩石研齋書目序敦夫太史樂志
鉛黃棲神典籍蓄書數萬卷日夕檢校一字之誤必求善
本是正竊怪近日士大夫藏書以多爲貴不論坊刻惡鈔
皆束以金繩管以玉軸終身不寓目焉夫欲讀書所以蓄
書蓄而不讀雖珍若驪珠何異空談龍肉哉若太史之兀
兀窮年蓋亦尠矣又云藩昔年聚書與太史相埒乾隆乙
亥丙子閒頻遭喪荒以之易米書倉一空自我得之自我
失之夫復何恨然師丹未老強半遺忘所棄祕笈至有不

能舉其名者惜未編目錄以誌之也 吳嵩梁香蘇山館
集江子屏藏善本書甚多歲歉持用易米念之心惻自記
以文屬爲賦詩藏書八萬卷讀書三十年躬耕無一畝賣
文無一錢吾儕抱書死亦得忍令儒林少顏色高堂況有
垂白親負米窮途感晨夕元鈔宋槧連籤廚全家不飽惟
自娛一朝割愛換升斗十年感舊增欷歔 阮文達高密
遺書序甘泉江鄭堂子屏嘉慶初入京師予薦館王韓城
師相家終落魄歸饑驅至嶺南余延纂廣東通志書成歸
揚州子屏隨手揮霍雖有陸賈裝無益也其師余仲林爲
惠松厓先生之弟子曾館子屏家

廉吏可爲未可爲槃纓請室等湘纍鼓琴誰折芳馨寄三復

于湖次仲詩

張祥雲鞠園

士禮居藏書題跋記輿地廣記余借抱沖殘宋本二十一
卷校勘於聚珍板上今已歸廬江張太守矣太守名祥雲
號鞠園以養親乞歸閩晉江人也丁卯過吳曾見之今聞
以事下獄瘐死矣壬申記 昌熾案張祥雲泉州府晉江
縣人乾隆五十二年丁未科進士三甲四十六名見國學
題名記 凌廷堪題張鞠園太守揚子飽帆圖飽帆曾記
過中泠今日于湖見使星大抵偉人多好士由來循吏必
通經相逢雖晚頭猶黑禮數都忘眼倍青笑我攜琴歸自
鼓還從流水寄芳馨自注時權蕪湖道昌熾案太守藏書
甚富今多歸同里蔣氏心矩齋

一留湖上一江湄鷺嶺藏書許共窺欲到建安眞洞府選樓

高處有雙碑

阮文達元

先正事略儀徵相國名元姓阮氏字伯元號雲臺乾隆五十四年進士子常生官清河道前卒福平涼知府祐舉人官知府昌熾案祐字叔錫 文達靈隱書藏記嘉慶十四年杭州刻朱文正公翁覃溪先生法時帆先生諸集覃溪寓書於紫陽院長石琢堂曰復初齋集爲我置一部於靈隱元與諸君子議曰史遷之書藏之名山副在京師白少傅分藏其集於東林諸寺孫洙得古文苑於佛龕皆因寬閒遠僻之地可傳久也今盍使凡願以其所著所刊所寫所藏之書藏靈隱者皆裒之其爲藏也大矣乃於大悲閣

後造木廚以唐人鷲嶺鬱岩堯詩字編爲號送雲林寺玉
峰偶然二僧簿錄管鑰之 又焦山書藏記嘉慶十八年
春元轉漕於揚子江口焦山詩僧借庵巨超翠屏洲詩人
王柳村豫來瓜洲舟次論詩之暇及藏書事遂議於焦山
亦立書藏以瘞鶴銘相此胎禽七十四字編號屬借庵簿
錄管鑰一如靈隱 韓崇爲妙詮和尚題焦山暴書圖詩
序儀徵阮相國立書藏於焦山妙詮收掌曬晾三十餘年
不懈益勤屬几谷和尚繪暴書圖同人題詠焉詩云焦仙
高隱處雲海盪心目中有積書巖瑤函謹編錄山僧謹收
掌不使塵手觸春秋佳日多時向晴曦暴浩浩海風來芸
香吹滿屋左右青琅玕翠陰覆玉軸繪圖索題句展開散

古馥何日寄禪關十年快披讀 李黼平小琅嬛仙館圖
詩司空博物冠今古聞自建安游洞府奇書天與特寓言
三十輛車人所睹羽陵嵩少自世閒宛委況自君家山但
然松節縛麻炬是身到處皆琅嬛 文達南宋淳熙貴池
尤本文選序元昔但得元張伯顏明晉府諸本卽以爲祕
冊嘉慶丁卯始從昭文吳氏易得南宋尤延之本爲無上
古冊矣元家居揚州舊城文樓巷卽隋曹憲故里李崇賢
所由傳文選學者也元旣構文選樓於家廟旁繼得此冊
藏之樓中別爲校勘記以貽學者 又題家藏延熹華嶽
廟碑詩我今快得四明本玉軸綈囊示尊顯豐全范錢三
百年入我樓中伴文選 昌熾案余所見宋刻金石錄文

達藏本有印曰癸巳曰節性齋曰文選樓曰石墨書樓曰
雷塘盦主曰亮功錫祐曰體仁閣大學士曰隋文選樓之
印曰泰華雙碑之館曰五雲多處是三台曰家住揚州文
選樓隋曹憲故里其 內府校書一印曰臣元奉

敕審釋 內府金石文字又一方印其文曰揚州阮伯元
氏藏書處曰琅嬛仙館藏金石處曰積古齋藏研處曰譜
研齋著書處曰孳經室又有闕里阮孔經樓孔子七十三
代長孫女諸印則文達繼配衍聖公女孔夫人也夫人著
有唐宋舊經樓臺世號經樓夫人又有靜春居士阮劉書
之二印文達集中屢有示書之詩當是其侍姬也

山陽笛韻不勝酸紅蕙飄零骨未寒話到青箱靈鬼哭祇留

佳壻比韋寬 袁廷禱又愷 貝壻簡香

湖海詩傳袁廷禱字又凱號綬階吳縣人監生 同治蘇州府志廷禱更名廷壽六歲而孤生母韓教之成立家有竹柏樓韓所居也 王昶漁隱小圃記袁子又愷漁隱小圃先爲王岡齡居名江村山齋又愷之兄岡齡女夫也故是圃歸袁氏又愷拓而新之入門貞節堂三楹後爲竹柏樓蓋奉母韓太夫人而竹柏所以況其節也 錢大昕五研樓記袁子又愷向居金昌亭畔題其讀書之室曰三研齋三研皆其先世所貽一爲介隱先生物一爲謝湖草堂研則尙之先生物一爲列岫樓研則承之先生物也丁巳歲青浦王侍郎以所藏清容居士研贈又愷錢唐奚鐵生

爲作歸研圖未幾又得谷虛先生廉石研并前所藏而五
是夏又愷移歸楓橋舊居謀藏書之所惟茲樓宜乃奉先
世手澤及古今載籍收藏惟謹名其樓曰五研暇日坐樓
中甲乙校讐丹黃不去手 漢學師承記袁上舍壽階明
六俊之後五研樓蓄書萬卷皆宋槧元刻祕笈精鈔又得
洞庭山徐尙書健庵留植於金氏聽濤閣下之紅蕙種之
階前名其室曰紅蕙山房四方名流莫不拏舟過訪壽階
性好讀書不治生產坐是中落奔走江浙閒死年四十有
七 聽秋聲館詞話袁綬階性吝一介不輕與聞龍雨樵
謫戍袁湘湄典質所有集二百金以贈咋舌曰是獨不畏
寒餓乃身歿未久子若孫弗克負荷田廬斥買殆盡元和

顧澗蘋過其故居感賦月下笛云試問樓中身前肯信破
家如此又云魂歸白晝常聞哭想只戀青箱未死昌熾案
綬階子爲蕘圃之壻蕘翁此山詩集得諸五研樓賦二絕
志感云漫說收藏五研樓人亡人得已堪憂而今樓在人
何在手觸遺編涕泗流白隄蕭瑟起悲風又見楓漁老去
同從此城西蹤跡少僅存水月一衰翁山陽笛韻可爲嗚
咽者已 紅蕙山房吟橐題貝壻簡香味書圖嗜好由天
性詩書豈厭多一編可陶養千卷恣研摩餘興搜金石閒
情託詠歌酸鹹與世別莫訝笑殊科昌熾案貝名壻字旣
勤有千墨奩著錄甚富同治蘇州府志壻亦好藏書好金
石書畫略與廷禱相似以嗜古不事生產貧其家持靜齋

書目續疑年錄四卷貝氏友漢居鈔本有礪香居士平江
貝氏文苑諸印

廢殿城南列女圖先秦禮服古尊壺阿和阿道皆無恙但少
籛金與斛珠顧之達抱沖

顧廣圻撫本禮記鄭注攷異序從兄抱沖名之達元和廩
貢生歿於丁巳春年四十五 昌熾案抱沖先生乾隆四
十一年謝宗師科試入元和縣學見三邑諸生譜 黃丕
烈蘆浦筆記跋過學山堂見亡友顧抱沖手閱汪文盛本
漢書著筆不多想未經卒業之本流落坊閒忽過余眼倍
增懷舊之思矣抱沖之歿其二子皆髫齡今皆成人昌熾
案澗蘋跋高注戰國策有云留示阿和阿道卽其二子小

名也 昌熾案蕘翁跋和靖詩抱沖歿於四月與澗蘋之
言不同當以澗蘋爲正其藏書處曰小讀書堆 焦循四
哀詩願之遶吳中諸生乙卯遇於秦淮明年至其書室得
覩藏書時校刊列女傳值君病死死數月書方成詩云抱
沖奕奕目光照人鶴作形氣書爲性真我識君屋背城面
津丹鉛縱橫誦讀不輟誦讀不輟今輟且絕將旅吳聞我
欲迂行 瞿中溶輓願抱沖茂才詩嗟嗟願君好讀書百
萬牙籤皆玉軸宋刊元印與明鈔插架堆牀娛心目一握
書論一斛珠購來手自三薰沐黃金散盡爲收書祕本時
時出老屋又云令弟風流歎阿兄遺書謹守藏家塾徧乞
名公作傳銘一甌和淚重編錄自注抱沖著有一甌錄

得書圖共祭書詩但見咸宜絕妙詞翁不死時書不死似魔
似佞又如癡

黃丕烈紹甫

同治蘇州府志黃丕烈字紹武乾隆戊申舉人喜藏書購
得宋刻百餘種學士顧莼顏其室曰百宋一廬 王芑孫
黃蕘圃陶陶室記同年黃蕘圃得虞山毛氏藏北宋本陶
詩繼又得南宋本湯氏注陶詩不勝喜名其居曰陶陶室
飲余酒屬余爲記余未及爲也後二年又得南宋本施願
兩家注東坡和陶詩於是復飲蕘圃家而卒爲之記曰今
天下好宋板書未有如蕘圃者也蕘圃非惟好之實能讀
之於其板本之後先篇第之多寡音訓之異同字畫之增
損及其授受源流繙摹本末下至行幅之疏密廣狹裝綴

之精粗做好莫不心營目識條分縷析積晦明風雨之勤
奪飲食男女之欲以沈冥其中蕘圃亦時自笑也故嘗自
號佞宋主人云今者託趣於陶陶非獨喜其宋本之不一
而足也蓋蕘圃宜爲縣而不爲略似陶公其力耕校書又
大致彷彿故因以自寓焉然陶公處衰季求官於貴族濡
足焉而後去之蕘圃遭逢盛際以高材久次隨輩獲選不
由求請顧且灑然脫屣歸臥不出斯其遇遠勝陶公又陶
公讀書不求甚解蕘圃則實事求是蒐亡剔隱一言一句
鑒別古人所未到時以筆諸書而廣其副嘉惠方來蕘圃
讀書之專且博亦非陶公所及也然則蕘圃之命其室與
虞伯生諸賢之命其室者取義不同而蕘圃之趣遠矣蕘

圃年未老宋板之書廬至未已家雖不豐力能致酒春秋
佳日招其二三同好盤桓乎是室臚列宋元校量完闕釐
正舛錯標舉湮沈當其得意流爲篇什以視陶公當日所
謂款然良對者未知同邪異也余生平讀書第取有字不
能如蕘圃之精求好寫今茲晚晚隳學無復可言然蕘圃
旣託趣乎陶陶矣誠欲賡由房之唱而極舞詠之情其能
舍余哉爲記之如此 沈士元祭書圖說黃君紹甫家多
藏書自嘉慶辛酉至辛未歲常祭書於讀未見書齋後頗
止丙子除夕又祭於士禮居前後皆爲之圖夫祭之爲典
鉅且博矣世傳唐賈島於歲終舉一年所得詩祭之未聞
有祭書者祭之自紹甫始 顧廣圻士禮居祭書詩歸家

倏忽歲將除折簡頻邀共祭書君作主人真不忝我稱同志幸非虛儀文底用矜能創故事還應牙率初更願齊刊刊舍奠每陪酌酒與羞蔬 又復翁詩一首卅六韻復翁復生書不死遠信初聞雜驚喜歸來見面爲我泣益信於翁是知己翁言病中前後事卅日昏昏臥牀第薄寒中人疑魁崇季咸奔走煩禱祀溫涼補瀉錯投藥坐覺增劇乏良已瀕危者再再尤甚竟比焦原託垂趾親戚相與興謗訕謂翁致此別有以虛空有物曰造物其所深忌在書史滿家每詫希世珍一一均堪顛跋使更蘇勿藥神助之此論紛紛罔少止特勞然否就我訊據牀走筆付雙鯉我聞斯言細忖度辨說蓋失其當矣死生有命語則云與書曷

啻風馬似前歲某甲委盛年一丁不識至癡伯昨歲某乙
化奄忽終身甯離菟園裏翁獨安穩出風波巨海崩騰屹
山峙苦翁者醫愈翁命唯翁自審徹終始況乎翁之不合
盡爲書功臣最足恃古人地下倘有靈慧命攸寄宜降祉
方今學子多鄙夫但向細縑求利市卜兆從卻僂句僭銛
錐鑽破俗物李牛頭馬脯工借題強韻那惜識者恥翁讀
未見根性命消融名利同查滓須知超邁流俗外只此相
歧千萬里抱殘守闕碩果存殆可剝九一爻擬陽無絕本
三聖義莫斷書中真種子果爾黃鍾律乍調見天地心霍
然起嗟我夙昔發奢願抉眞抑僞思料理哀傷吾道多榛
蕪誰解墾闢施覃耜遂乃憂心愠羣小幾欲見殺累切齒

未填溝壑尙假年奚必河清壽難俟從來萬事命也歟庸
鬼庸人等妄耳作詩贈翁翁聽取曩我稱翁作奇士今者
弗死豈偶焉放佚羣編待統紀翁能傳書書傳翁千秋不
朽靡涯涘復哉復哉無恙耶肯任百年駒隙駛 瞿中溶
古泉山館集題黃蕘夫祭書第二圖祭書圖作後先論妙
繪同逢道子孫歎我風塵淪落久奇書空向篋中存注云
前圖吳竹虛作此圖吳枚庵作浪仙嘉話古來無周墨黃
書接步趨我有癡情同是癖也思補畫祭錢圖煙雲聚散
本無常祇合流傳在四方但得主人真好古校讐刊布似
黃郎注云時蕘夫藏書已多轉歸他姓 又嘉平廿又三
日黃蕘圃移居懸橋巷出新詩與圖見示因題四首祀竈

恩恩逼歲除有人於此賦移居披圖莫認村夫子曾讀人
閒未見書舊治東偏古寺西平江一櫂接葑溪滿船載去
書千卷入室先教插架齊一徙楓橋一縣橋良朋從此路
迢遙丁甯倘有奇書獲共賞還來折簡招滯我吳閫廿載
多身如幕燕不成窠練邗久有歸耕願無計移家喚奈何

昌熾案乾嘉以來藏書家當以先生爲一大宗當時顧
千里爲作百宋一廛賦近潘文勤師刻士禮居藏書題跋
記六卷及門江建霞太史又刻續錄二卷訪百宋遺聞者
此其淵藪矣先生得一奇書往往繪圖徵詩有得書圖續
得書圖再續得書圖今皆散逸其名之可攷者曰襄陽月
夜圖得宋刻孟浩然詩作也曰三徑就荒圖得蔣篔亭所

藏三謝詩作也曰蝸廬松竹圖得北山小集作也余所見元機詩思圖爲得咸宜女郎詩而作其所輯所見古書錄亦無傳惟自序兩言云編殘簡斷市希駿骨之來墨敝紙渝窺詡豹斑之見見元統元年進士題名錄跋先生號蕘圃或題蕘夫亦曰老蕘乙丑病瘳自署復翁亦曰復初氏亦曰復見心翁陳拙安爲鑄一陽更生印又號廿止醒人五十後號知非子晚年又自號抱守老人席上輔談跋時六十一歲自署秋清逸叟其藏書之印曰百宋一塵曰讀未見書齋曰陶陶室其藏詞曲之所曰學山海居又閒有署紅椒山館學耕堂者不能枚舉也 又按廿止醒人初不得其義旣見士禮居題跋續錄內老學庵筆記兩跋皆

自署廿止醒人後又繫一跋云廿止醒人之自號蓋余取淵明詩意淵明詩止酒一章廿句句有廿止字止酒則醒矣余自甲寅丁外艱乙卯遭火災遂至日蹙一日二十年來夢夢今醒矣殆將自止矣淵明詩本有廿止字而今適當廿年非前定耶乙亥端陽前四日

與花同好月同明修到雙芙有幾生薰沐爲書題佛號生生

世世出秦阮 張燮子和 孫蓉鏡芙川 姚晚眞

蘇州府志張應曾字若谷昭文人蒲江知縣子燮字子和乾隆癸丑進士歷官甯紹台兵備道以詞章名世 士禮居藏書題跋記嘉四靈詩昭文同年張子和藏書也余與子和相得以彼此藏書故猶憶癸丑同上春官邸寓各

近琉璃廠每於暇日卽徧游書肆恣覽古籍一時有兩書
淫之目 又題明秀集詩琉璃廠裏兩書淫蕘友蕘翁是
素心我羨小琅嬛福地子孫世守到於今道光四年甲申
蕘翁爲芙川世講書於百宋一塵昌熾案小琅嬛福地張
氏藏書處芙川名蓉鏡燮之孫娶姚氏名畹眞號芙初女
史亦精鑒別故其夫婦藏書印曰雙芙閣余見宋刊後村
詩集殘本有芙初詩云墨林萬卷劫灰餘古本流傳此絕
希八十詩翁高格調伊川擊壤想依稀潑茗薰香繡嬾拈
芸編珍重展瑤籤好花明月原無主自取猩紅小印鈐又
題云道光戊子二月花朝琴川女士姚畹眞芙初氏時年
二十六歲清寒淒雨病榻淹纏腕弱字劣不計工拙也無

虛佳日而已又有方若蘅跋云道光庚寅上巳桐城女士
方若蘅叔芷氏假讀於鏡清閣時盆梅尙未全落靜對占
編覺幽香與墨香同耐人尋味也若蘅爲勤襄公之女自
號畹芳女士 莫氏經眼錄云蜀大字本史記集解芙初
女史藏本亦有勤襄公五女若蘅二印蓋當時兩家閨秀
一瓶往還洵玉臺之佳話已 鐵琴銅劍樓書目宋本擊
壤集芙川藏書卷三冊首空葉有芙川以血書南無阿彌
陀佛六字題其後云乙巳十一月得之愛不能釋以血書
佛字於空葉惟願流傳永久無水火蠹食之災 張氏藏
書印記纍纍不減項子京曰虞山張氏曰琴川張氏曰清
河伯子曰蘿摩亭長曰張氏圖籍曰芙川鑑定曰曾藏張

蓉鏡家曰芙川張蓉鏡心賞曰虞山張蓉鏡鑒藏曰虞山
張蓉鏡鑒定宋刻善本曰小琅嬛福地曰小琅嬛清祕張
氏收藏曰在處有神物護持又曰一種心勤是讀書則芙
初女史印也

談古相逢燕市中名場溝水各西東長安珠桂還如昔典盡
殘書莫送窮

黃錫蕃椒升

韓配基

士禮居藏書題跋記海鹽黃椒升余二十年前友也頗藏
書兼精篆刻嘗往來吳門從潛挈老人游每至必攜古書
相質余時或得之後爲小官於閩中 又輿地廣記宋本
第十八卷改曰建雄軍以上全缺竹垞藏本歸乍浦韓配
基壬戌春余計偕北行配基亦以辛酉選拔朝考入都把

晤京邸許以十八卷前寫寄後余被黜南還配基亦未得
高等彼此音問不通至今不能補全可慨也 又云韓應
京兆試中丁卯科舉人在京邸求售余託五柳主人爲余
出百二十金購之 又云賈人從乍浦韓氏得書數百種
盛稱中多舊本有施諤臨安志歸簡莊同人賦詩紀事簡
莊詩云輸錢吳市得書誇道是西施入館娃宋室江山存
梗概鄉邦風物見繁華關心志乘亡全帙屈指收藏又一
家況有會稽嘉泰本賞奇差足慰生涯 前塵夢影錄嘉
興黃錫蕃酷喜古印有續古印式一卷 持靜齋書目文
房四譜五卷黃椒升藏本有醉經樓印

瘦骨凌霜破拘闔小松何似老松強吳涇延令同根否綠柳

橋西戴大章

戴光曾松門

戴大章堯聲

士禮居藏書題跋記笛漁小橐嘉禾戴五松門余舊交也
今春閏月二日有事至禾中夜訪松門於吳涇橋徧閱所
藏之書作詩贈之有句云從好招朋共傷心失子才蓋松
門與余同好而境遇亦相等也 趙之謙張肩甲乙雜著
跋此書末有小記署光曾爲戴君松門嘉興諸生以學行
受知於阮文達 錢泰吉可讀書齋詩戴小松茂才培成
爲松門明經光曾哲嗣馬古芸蔣花隱嘗寫懷松圖以貽
之道光壬寅冬日小松奉圖見示感賦偉哉松門翁我少
常接對瘦骨凌雪霜高論破拘閔不怨匠石遺絕洗庸俗
態送老撫庭柯慘澹冀千載何人抱遺編有子懍惇誨遂

倩碧蘿生潑墨寫蒼黛蔣君亦成圖著紙露礮礮小松能
仰承肅若瞻泰岱老松蔭庇之風雨聞警咳 前塵夢影
錄墨表上下兩卷禾中名士戴松門光曾輯 楹書隅錄
宋本說文解字有延令戴大章字□□一字南軒大章堯
聲綠柳橋西戴大章各印

藏書紀事詩卷五終